

清代昆陵名人小傳稿

蔣維喬署簽

上册

上海图书馆藏书



A541 212 0014 93128

序

昔閩縣鄭荔鄉先生方坤輯名家詩鈔小傳首施宛陵閩章迄鄭石幢方城凡一百零四家而以聯句詩鈔終焉海鹽吳子修先生修輯昭代名人尺牘七百餘通分爲二十四卷吳氏書雖以書家爲主而於理學忠孝名臣逸士與經史金石詩古文家詞曲家畫家所見無不采輯更於簡首輯小傳以資考核又如漁洋感舊集於身後四十年始由盧雅雨校刊雅雨於運使署中延張孝廉榆村采集故實仿遺山以下各詩選之例人系之以小傳王蘭泉湖海詩傳亦有小傳一名蒲褐山房詩話可見小傳之作關係綦重余於二十年前選輯道咸同光四朝詩史甲乙集曾撰各家小傳及辛亥國變倉卒付刊集中小傳尙缺十之三四嗣又擬輯清代詩人小傳及清人別集目錄均以卷帙浩繁纂集匪易又困於謀食時作時輟年逾周甲精力就衰歲不吾與恐終無殺青之望良用自愧同社武進張君季易銳意著書勇猛精進昨歲所輯疑年錄彙編帝王疑年錄及明清巍科姓氏錄余均序而行之頃又以清代毗陵名人小傳十卷暨清代毗陵書目八卷見示小傳初名獻徵

後改今名采輯該洽敘述詳略得宜閨秀列最後之第十卷前九卷中若理學忠孝名臣逸士與夫經史金石詩古文家詞曲家書畫家靡不甄列與吳子修氏昭代名人尺牘小傳用意相同而更推廣及於琴棋醫術以至鐫印刻竹鑑賞板本諸家以見藝進乎道曲成不遺之意且吳氏小傳僅詳姓字爵里科分著述此則綜論生平行誼并采及詩文集序中要語蓋兼有鄭荔鄉廬雅雨張榆村王蘭泉諸家小傳之長而又不限於詩人網羅舊聞嘉惠來學貽高曾之規矩示後進以準繩洵可云不朽盛業矣今之少年習於諺誕動謂昔之人無聞知吾知季易之孳孳矻矻成此鉅編其用意蓋至深且遠繫辭傳有云作易者其有憂患乎吾請爲季易誦之毗陵爲吳中大郡六朝唐宋以來代有聞人近歲盛杏孫尙書曾刊常州先哲遺書由繆藝風師主其事盛氏又刊有續經世文編聞係呂幼舫舍人景端所輯於毗陵近代名人文牘書札采錄尤多吳孟棻孝廉翊寅屠敬山太史寄又有常州駢文之輯亦復哀然成帙是皆留心鄉邦文獻能盡後死之責者誠使茫茫禹域通都大邑下至叢爾偏隅皆如毗陵之攷獻稽文原原本本又安有數典忘

祖祀宋無徵之慨乎清代毗陵書目第一二三卷爲經史子三部集部書較多析爲二卷列第四第五其第六卷爲校刊之書第七第八卷爲已佚之書仍各依四部分列不與自著之書及現存已刊之書相混條分縷晰朗若列眉俟異世之蒐亡存舊德之名氏其思來述往之盛心尤有不可沒者余故樂爲序之至於智者千慮必有一失軼聞墜簡蒼萃爲艱豈能以一人之力數載之勞遽臻於完密盡善之域則季易固云訂譌補缺俟諸方聞之君子矣昌黎氏有云怠者不能修而忌者畏人修閱者幸勿以吹毛刻舟之見輕加指摘而反助不學者以張目也共和十有六年歲在丁卯夏正孟夏之月常熟孫雄師鄭氏序



清代毗陵名人小傳稿 序

清代毗陵名人小傳目錄

卷一

吳光

惲日初楊稱

楊珮

龔策

惲本初

馬負圖

唐獻恂

唐宇昭弟字量字全字于光姪襄鉅

邵長蘅

董以寧

毛重倬

毛會建

毛留鄴

蔡所性

段麒

朱二采

龔百藥

呂宮

莊回生

孫自式

董文驥

薛信辰

張星瑞子祖錄

祖鑄龔廷歷

巢震林

唐振芳

黃永

黃京魯劍孫以鐸毛羽宸

許之漸

吳珂鳴

鄒祇謨

劉維烈

楊大鯤

董元愷

蔣鑰

司旭

莊媚生子紹平

陸苞允

薛弈白銘楊二傳

吳闡思

卷二

惲壽平

陳玉璫

楊宗發

陳鍊

胡香昊

董大倫

唐惲宸

張子畏

董瑜

王之仕

朱嶼

趙申喬

臧琳

楊祖祥

龔士薦

龔士燕

薛瑁

白萬楊喬年唐守肩

△錢以爵

子維岳

楊大鶴

子楷楊士凝

楊士凝

錢二白

錢大經錢大猷錢大鏞

周清原

子嘉梓

龔勝玉

莊絳

楊玉

蔣金式

子鴻翻姪文元芳洲敦淳

陶自悅

龔雲起

陳聶恆

徐永宣

錢名世

父養浩兄濟世

唐執玉

子孝本

莊令輿

程彥

惲鶴生

子宗洵宗和

卜俊民

劉於義

莊楷

孫應榴

湯自奇

高尚正

如蟬先屠耀采

蔣理正

孫夏

顧秉信

章大士石永芳

湯誥

錢理

曹朝

章惟殷玉函荆振翔張天申楊通倫

鄭朝統

張南溟

呂師

子驥

趙侗

敦

瞿朝晉

蔣 梧

管滋琪

白太官

卷三

蔣汾功 弟驥

鄒光濤

徐 崑

潘思築

謝 旻

楊方達

秦宮璧

莊 柱

許元基

丁元颺 兄名世

周駿嶽 姪宏源廷相

張一是 兄一備

趙彪詔

陳 儀

胡 淦

段之縉 子汝舟孫達和

錢枝起

莊廷璽 莊咏麓莊寶煊莊俊家

屠 遠

吳龍見

唐 春

朱典六

徐 煦

徐元璣

卷四

劉 綸

楊煜曾 秦懋紳吳溶

劉鳴鶴 子欽

王光燮

蔣麟昌

程景伊

龔錫純

楊述曾

湯大紳

白仲徵

錢維城 子中鉅

莊存與

李 英 弟蕓

盛 綱

楊肩吾

是 鏡 盛衡

胡時顯

許璿耀

楊文言

劉星煒

惲源景

張洽

蔣和寧子齊耀

胡儻

莊培因

莊忻

楊濟恩弟湛恩志洽

湯脩業

朱文嶸

劉煥章

趙翼

張蟾賓

毛穎士

畢涵子用霖

崔龍見

楊超子垣

陳明善

伍宇昭子魯興

伍宇澄

錢伯垆

錢維喬

董潮

湯大奎子洵業

湯伊勳孫隆誼曾孫述高

呂嶽自弟岳尊榮慶

吳一諤

錢履坦

程景傅

龔顯祖

承任張淳

李瑞岡

吳星萃父桂枝

鄭甫

胡文英

高寶仁

楊鷺

卷五

劉躍雲

管幹貞

奚寅

周景益趙學申沈霖

唐為坤弟為垣

莊通敏

徐大榕

莊勇成

黃景仁

惲源濬惲瑀惲宅仁惲與三惲標惲奎惲源成惲廣颺

李汝勵

管世銘

許亦魯

丁履端

陳祖

沈箱傳

袁廷吉

莊述祖子又期

趙懷玉

呂光復

楊倫

盛惇崇

盛惇大

孫念劬

劉岱松

惇敬

惇敷

吳堂

吳增

錢青選

鄭環

方聯聚

包士曾

孫星衍子廷鏞

楊夢符

錢夢雲

趙炳

高荃子承鉉

謝珍

惲蘭枝陸孟甲

陳景蕃

瞿曾輯

劉遵陸

洪亮吉子銓孫符孫

莊達吉

毛燧傳

莊有可

蔣雲一弟承曾

董達章

錢夢蘭

左輔

陸壽昌子鏞

臧庸弟禮堂

王曰旦

金廠

徐書受

莊寶書

呂星垣

李慶來

莊宇達

陳紹琦

鄒牧

唐翊華

莊曾儀

徐準宜

崔景侃

伍嗣興 楊奎曙

王 甌

吳士模

奚 賓

莊關和

湯自銘

史次星

唐本銓

孔 璞 蔣經元

屠清渠

戈裕良

△徐應熙 子會

卷六

吳光悅

張惠言 子成孫

張 琦

楊傳榮

陸繼輅

陸耀通

楊元錫

陳 森

周夢熊

畢訓咸

畢 簡

趙學轍 子京錫

余 彤

陳 鏞

楊鼎高

許 沅

周儀暉

李兆洛

魏 襄

劉嗣綰

趙植庭

丁履恆

龔 鏜

錢相初

黃載華

管貽荪

高星紫

董士錫

朱昂之 弟端

孟覲乙

劉逢祿 子承龍

管學洛

黃乙生

莊綬甲

湯貽汾

趙申嘉

董基誠

董祐誠

方履錢

楊士昕

卷七

楊時泰

李述來

楊新甲

丁嘉植

莊存

楊近思

陳峻

孟耀庭

楊振

韓桂

湯洽名

費開綬

蔣彤

李嶽生

高昕炤

△屠珂

鄒澍

湯建中

惲秉怡

臧相子照

顧文炳

蔣學沂

劉嗣富

管繩萊

惲彙昌

劉可培

謝應芝

史秉直

言啓方

史福臻

趙仁基

程應權

談灃

符瑩

董似穀

湯成烈

吳頡鵬

陸容

張鏡淳

汪暎

張璇

父鋌子達成熙成照

陸敏政

李以謙王士儻

董文毅

任在豐沈德龍劉儼

程兆和

陸慶頤

湯璫

兄珩

薛子衡

莊縉度

弟士彥

呂佺孫

陳肇鏞

史致澤

丁嘉祿子紹基

史致諤

吳自徵

徐廷華

洪齟孫

湯用中

呂成忠

陸循應

董毅

莊受祺

趙起

陸黻恩

姚華國

湯成彥

汪士進

張曜孫

周儀顥

△錢弁萬

汪昉

劉達善

章汝成

孫炳煥

馮宸簡

烏季韶

呂儁孫

劉翰清弟憚

袁績懋

余光倬

楊傳第

馮瑋

糜澳子準

呂耀斗

董用威

陸荃

△徐燮鈞

△徐星鈐

△吳起鳳

△宋景濂

卷八

許棫

周騰虎

方駿謨弟駿謨

承越

趙曾向

蔣曰豫

惲光業

費伯雄

△錢心坦

△錢心榮

吳咨弟傲

史致準

管 晏弟樂

湯綬名

湯懋名

湯祿名

楊大鏞

陸迨光

劉培芬

陸初望

惲祖貽

△惲思贊

吳唐林

楊祖學

莊怡孫△弟廣良

△沈耀鑿

△沈保靖弟嗣綬

吳寶鈞

趙烈文

程繩武

唐 熙

唐曾頤

王銘西

汪 晉

△李正光

△李正華

卷九

方 楷△子賓穆

陸爾熙△弟爾毅

馬文植

△陳亮疇子允頤重威允豫

△管元善

沈昌宇

莊士敏

吳 璵周同毅

黃懷孝

陳 煥

汪彥份

惲彥彬

錢嚮杲

徐壽基

汪孝寬

湯世樹

湯 鉉

莊鳳威

△湯國培子沛

高粹曾

朱兆綸

馬寶文

△盛 隆子康 庚

△盛宣懷弟星懷

方 恠

方 恆

方 怡

張 誥

劉炳照

楊光暄

楊葆彝

許衍熙

黃山壽

錢宗堯

△丁定安

呂景端

△謝潤

謝鍾英

費念慈

龔肇宗 父良若

惲毓鼎

惲毓齡

△劉鳳昇

△劉樹屏

劉可毅

△劉懽

△劉樹森

△莊興

汪洵

張鶴齡

李寶嘉

屠寄 △子寬

吳翊寅

陳欽

李寶淦

楊福祺

沈同芳

陶鈞

惲毓巽

呂光辰

△馮光勛 弟光通光元

△伍繼勛 子學熙學純子誠

△伍紹慶 子瓊

△陸爾奎

△錢鈞

卷十

△錢鏐 弟增勳子方琦

△劉毓森

△薛鴻年

△程炳熙

△唐洪培 子浩鎮滋鎮濟鎮折鎮

△沙燮和 子安節

△尤鴻賓 子柏年

△宋敏熙

△蔣樹德 子維瀾維鍾

△過燦

△張新

△王熙彬

△段鴻謨

△陶珙弟相

△莊鼎彝子俞

△王頌霖

△唐允中

△唐曾頤

△馮嘉錫

△巢鳳岡子鵬雲

△翁振銘

△莊蘊寬

△沈巖

△趙椿年

△姜麟書

△孟森弟昭常

△錢名振

△莊清華

△錢以振

△趙寬

△沈成一

△湯心存

△沈保宜

△劉堯琴

△劉尙德

△王定遠

△王理中

△李祖年

△管鳳齋

△趙宗詒

△伍達

△盛平章

△謝蔭昌

△屠振鵬

△屠聿方

△屠守昌

△劉勳麟

△憚樹珏

△錢蟬

△姚祖泰

△吳壽元

△苑履剛子賽

△陸維藩

△劉異權

△唐駝

△徐涵

△趙脩弟克承

△劉傳厚

△蔣光祖

△王懋德

△戴福祚

△屠方

△錢振鎧

△何嗣焜

卷十一 閨秀

吳永汝

周珊珊

束蕪

謝瑛

吳瑗

習忍

吳永和

半園女孫

憚冰

馬湘

張瓊娘

唐祖英 崔允嫻

湯朝

錢孟鈿

△莊玉嘉

王采薇

錢芬

莊盤珠

錢惠尊

莊芬秀

錢湘

湯瑤卿

呂福

丁瑛輝

張縉英

張縉英

張綸英

張紉英

李紫畦

程蕙英

董琬貞

湯嘉名

金佩芬

龔琴薇

呂畹蘭

憚懷娥

憚懷英

劉琬懷

呂承嬌 妹成婉

劉絮窗

憚璠

憚珠

陳素貞

呂采芝

呂采芙

呂稠福

秦蘭生

△徐文漪

陳蘊蓮

楊瑾華

楊璿華

左錫蕙

左錫璇

左錫嘉

陸 蓓

方蔭華

丁靜蘭

沈 珂

湯湘芷

許嘉儀

陳端穎

程浣青

陸 恆

陸蓉佩

伍宗儀

黃 馥

唐韞貞

王采蘩

孫嗣徽

王采藻

言 雅

何 禕

錢 希

謝 岱

△趙貞懿

△朱韻渠

△任玄珠

△沈韻繁

△劉 箕

△呂景蕙

△呂 鳳

△費 湘

△劉佩縵

△莊曜孚

△陳 警

清代毗陵名人小傳稿卷一

邑後學張惟驥季易纂

吳光

光字與巖武進人十齡喪母哀毀如成人幾滅性比就傅日誦數千言有文名久之厭帖括究心經濟務爲有用之學所論著自成一家言甲申之變慟哭求死不得取所擬時務策並雜著火之自是絕意人事結廬於滬東僻壤日閉門讀易倦則徐步隴畝與田夫畬叟較量晴雨話桑麻嗒焉自放於山水間大吏物色之堅謝弗往作野翁傳以見志其略曰野翁無姓氏問其年亦不記甲子性不喜城市雖居城市胸中自謂有邱壑也故自號野翁翁爲人少可而多怪落落寡諧然實平易近情雖樵夫牧豎未嘗有所忤少讀書得古人大意晚年一切束高閣編茅插籬廬於中田桑柘間將終身焉不復問人間世亦不復知有人間世或訝其作苦翁笑曰吾自樂此不疲也暇則把壺自傾不覺歌呼烏烏荆扉晝掩抱膝靜坐曰吾今日猶能置身羲皇以

上也標技野鹿庶未遠乎既自號野翁人亦呼之曰野翁野翁云著述頗富而易粕十箋兼窮象數義理所得尤深與盤屋李二曲先生善二曲爲作傳以比吳康齋所述之龍潭老人焉

鄒之麟

之麟字臣虎號衣白武進人明萬曆三十八年進士福王時爲尙寶丞遷都憲南都破還里自號逸老又號昧庵好古力學博極羣書文辭歌詩刻意師古山水樵黃子久但落墨不多寥寥數筆不求工好其曲折細潤六法俱備用筆圓勁古秀一種解衣磅礴之概卓然大雅不羣觀其勾勒點拂縱橫恣肆胸中殆有碗礪者歟其細密之作在雲東雲卿之間落落大方非尋常畫家所能望其項背也

憚本初

本初字道生號香山武進人諸生博學有文名崇禎十七年舉賢良方正除內閣中書棄官歸卒於順治十二年年七十與日初爲羣從兄弟相師友棄官後更名向畫學董源南田少時師之其畫懸筆中鋒骨力圓勁而用墨濃

濕縱橫淋漓自成一派晚乃斂筆於倪黃宋漫堂云香山畫有二種一種氣厚力沉全學董源爲早年筆一種惜墨如金脩然自遠意興在倪黃之間晚年筆也斯言得之有畫旨四卷孫阿匯序

馬負圖

負圖字伯河一字肇易晚號一庵武進人明諸生幼崇名節鼎革後獲交陸世儀遂參心性兼通名物象數與惲日初等講易延陵書院從學者甚衆生平篤信程朱不輕立說及卒門人私諡潛德先生

惲日初

楊瑀

日初字仲升號遜庵一號南邨別號南國餘民武進人崇禎六年副貢久留京師十六年應詔上備邊五策不報知時事不可爲乃歸攜書隱天台山中三年而兩京亡唐王立福州魯王亦監國紹興吏部侍郎姜垓薦日初知兵魯王遣使聘之日初以監國爲不然固辭不起清兵下浙避走福州福州破走廣州廣州復破乃祝髮爲浮圖號明曇已復至建陽是時清兵席捲浙閩粵三省唐王被執死魯王亦敗走海外湖廣何騰蛟江西楊廷麟等皆前後

破滅明遺臣民尙擁殘旅遙奉永明王金壇人王祈聚衆入建寧屬縣多響應於是建陽士民數百人噪於日初之門固請不得已至建寧見王祈非初志也日初曰建寧入閩門戶能守則諸郡安然不守仙霞關建寧終不守也欲取仙霞關宜先取浦城乃遣長子楨與副將謝南雲先趨浦城失利皆死而御史徐雲兵連入數州縣銳甚日初說令夜襲浦城自督兵繼進會大雷雨人馬衝泥淖行不能速將至城下已黎明軍遂潰清總督陳錦張存仁侍郎李率泰統重兵來圍建寧永明王使兵部尙書揭重熙赴援日初上書揭重熙請逕取浦城斷仙霞嶺餉道徐與圍中諸將夾擊之揭至邵武不能進建寧遂破王祈力戰死日初收散卒走廣信尋入封禁山中糧乏勢益弱喟然曰天下事壞已數十年如何救正然莊烈帝殉社稷普天率土齧齒腐心小臣愚妄謂卽此可延天命今乃至於此荼毒百姓何益遂收衆獨行歸常州久之張煌言與鄭成功軍薄江寧敗走訛傳煌言弟鳳翼乃日初門人從師匿縣官將收捕日初色如常曰吾當死久矣旣而事解卒年七十八康熙十七年戊午也少與楊廷樞錢禧交爲文章縱麗於百氏無所不窺尤喜宋

儒書及從劉念臺游學益進嘗上書救念臺義聲震天下既不得已歸常州仍服浮圖服而言學者多宗之無錫高世泰忠憲公從子也重葺東林書院日初與同志習禮其間知常州府駱鍾麟屢求見不納去官後與一見言中庸要領喜而去曰不圖今日得聞大儒緒論也同時有楊瑀者字雪臣亦有名於世甯都魏禧交天下奇士於毗陵則交日初及瑀

楊瑀

瑀字逢玉號砥齋武進人明崇禎九年副貢少穎悟九歲屬文踔厲風發頃刻數千言弱冠才名大振江浙諸君子皆爭與交諸名宿先後梓選其文傳海內尤與楊維斗錢吉士及同邑憚日初相友善以文章道義切磋身任綱常名教之重與日初肄業於陳渡山莊講論周易盡發宋五子之書伏而誦之悟太極之旨與先天後天對待流行體用一貫之妙四方好學之士聞風負笈者日益衆中年喪偶獨居三十餘年手不釋卷原本經義旁及子史以至漢魏唐宋諸名家詩文無不手披口誦其古文宗昌黎詩宗子美然不欲以詩文自名惟以明正學闢異端爲己任

龔 策

策字晉之武進人明諸生究心史學尤長詩賦明亡作金陵燕臺懷古絕句各百首其文約其義隱爲時所重又作三朝史議三篇其最善者言建文帝未遜時史臣紀事不當內靖難而外遜國持論平正君子建之順治中以貢入太學除鄧州同知初客關陝間題名華山巔因號天岳山人既仕清猶以山人自命人謂不忘故國之官未數月卒

陸士楷

士楷字介侯別字崑庭武進人明諸生入清隱居教授以終專心理學以聖賢名教自任嘗師事李顥記其論學之語爲中孚語錄以訓門弟子婁東陸桴亭至輒主其家論學極契嘗病尙書訓詁家浩衍鮮要語多踳駁明以來一宗蔡傳旨未純備讀者病之乃蒼萃諸家融貫衆說輯尙書彙纂桴亭爲之序而行之年七十八卒

唐獻恂

獻恂字君知號潔庵武進人明廩生聞莊烈帝殉社稷北向痛哭遂棄諸生

業服黃冠嘗渡錢塘游越中問遺民以江東戰守狀重道義恆破產振親朋
厄有假貸者卽焚其券與同郡楊雪臣惲遜庵等六七人砥礪名節關中李
顯講學吾鄉特與印契年八十六卒

唐宇昭 弟宇量 字全 子于光 姪襄鉅

宇昭字雲客自號半園居士亦號半園外史一作名禹昭字孔明武進人明
崇禎九年舉人荆川玄孫孫慎行門人鼎革後不復問世及弟宇量偕隱有
司迫上公車中途遁歸迨遙翰墨人稱唐氏二難與惲南田王石谷爲石交
宇量字茂弘一字聞川別號癩雲道人崇禎十二年舉人嘗自爲狀彷彿元
亮之傳五柳云

宇全字人玉貢生明亡與兄偕隱所畫壽星今海上有藏之者價重連城
于光字子晉宇昭子工丹青名侔南田有唐荷花惲牡丹之目襄鉅字匡九
號西航宇量子有詩名

邵長蘅

長蘅字子湘武進人十歲補縣學生以奏銷案黜古文與侯朝宗魏叔子稱

鼎足詩劉濼頓挫力追唐人嘗選明何信陽李北地王弇州李滄溟四家之詩矯錢牧齋持論偏駁以程孟陽爲纖佻識者躋之晚歲入商邱宋犖幕府乃變蘇黃范陸之派亦宋詩中矯矯者然視前作如二手矣

董以寧

以寧字文友武進人貢生與陳其年鄒祇謨並有才子之目少負重名豪邁感慨不可一世然其恤交遊急然諾又復纏綿婉篤比於膠漆博覽強識著書滿家執經弟子恆數百人視天下無可交者每朋聚翕熱手揮而已如不相識及合坐捉筆爲文獨寫數千言不休文成坐客不解一語輒瞠目相視人咸目攝之嘗自言予與祇謨非惟文章道同覺性情亦近彭孫遜見以寧詞笑謂祇謨曰泥犁中皆若人故無俗物宋犖作以寧文集序云予未弱冠卽篤好古文辭思徧交天下奇士於同邑交侯子朝宗最先其後渡江而南則交董子文友於毗陵愛其古文與朝宗等蓋朝宗之文奮迅振耀如疾雷破山電光穿屋駭人心目其文得雄氣爲多文友之人英氣秀發如三伏日涼風徐引甘雨忽來無不爽然於心快然於目朝宗古文獨爲之舉世不爲

之時以創於北而後古學大興於南方則自文友開其先文友英氣得之於天一往駿爽可稱有筆其文較穆伯長蘇子美之倫誠不愧要與朝宗並傳於世無疑也

毛重倬

重倬字卓人號劬軒又號補菴武進人順治二年舉人旋以文體怪異被斥筮仕得太湖教諭改太倉學正遷浙江石門知縣自劾去既苦貧乞祿養補江西贛州府經歷外艱歸遂不出生平好讀書始慕阮嗣宗諸賢放達自奇久之更爲繩墨曲謹束脩效悃悞晚更講學論道恬退養高其爲文初擬唐宋大家寢食昌黎眉山間數年變而爲遷固又倣諸子雜家變之於六經識者謂卓人學識凡三變屢變益工卒年六十九

毛會建

會建字子霞武進人順治二年副貢仕至禮部員外郎能文章工擘窠書客遊湖廣致千金僑居武昌因家焉好奇而善遊所至往往作斗大字勒崖石題名其後嘗模岫巖禹碑立石大別山巔又營生壙於大別山自爲誌銘系

以詩

毛留鄴

留鄴初名章斐又名雲仍字子亶號旦齋武進人博極羣書受業無錫馬文忠文忠以公輔期之與吳門會稽諸名士爲同聲慎友之盟若仁社國儀社羣推祭酒焉長於論史又覃研經學性好山水探奇訪古踪跡幾遍天下以省父至閩會耿逆之變長繫榕禁二載王師滅耿始得脫歸歸與黃永陳玉璣輩爲耆英之會花晨夕月往來尊酒竟以是終老

蔡所性

所性字仲全武進人居城西山林里相傳爲晉司徒道明蔡公之後世以耕讀爲業少時諸同人皆習制舉業所性獨喜觀綱目性理及先儒語錄十四五嘗和其先人仰懷公東溪詩有若得臨深不愧影春光風俗可從游之句識者知其後必以儒行稱十七八見閩中顧茂猷以五經中式遂奮然欲效之力通五經每小試輒揮數義然是時制科法弊游庠序者非賄賂請託不可所性又力持古道以爲進身之初必不可由詭遇甯受擯毋捷得人皆笑

之所性泰然不以爲意申酉間遂絕意干祿足跡不入城一意學古家無書每從人借讀嘗得二十一史日讀一本計四百八十日而遍略皆上口凡天文曆數律呂皇極洪範奇壬之屬悉不由師傳仰而闚俯而竿讀而疑疑而復讀不能遽通則擲書於牀縱步田野間或立溪流樹影與樵夫牧子互語忽一意悟到則倉皇奔歸索書急讀則古人之意已豁然矣如是者數年始入城憲副岳虞巒方注易與語大奇之留共參訂每嘆不及同時有一菴升書二馬子者邃於理學一見相得甚歡引爲性命交朝夕切礪庚子徒步三百里訪陸世儀於婁婁中諸賢與所性接席者無不咋舌稱歎所性歸益以絕學自任其族人靖公進士聚友數十人從之講五經同異所性南面踞高座言如河漢聽者俱屏息或間有可否則務取理勝相掩不以辭長也一時縉紳名流及聰明傑出之士皆樂與之游所性悉出其胸臆無所吝毗陵明天文星曆律呂諸家如二馬子楊爾京龔武仕之傳皆所性之切磋爲多性至孝友父病目所性日以舌砥目病結以指導其糞母章氏姚氏之病雖廁淪之屬必躬必親居三年喪蔬食異寢如古禮有姪中年逝爲養其孤寡脩

晡所入輒代其弟完逋賦子苻能讀書力耕養父米鹽之事一切不問也與人交和易善笑語如醇醪之醉人毗陵城中人士好學者見所性輒迎致如洛故事家有行窩每入城隨意所適無專舍貌樸如野人與乍接人多忽易久乃益敬常遊西泠達官見者不爲禮語一再接驚趨下座再拜稱謝呼爲先生顧又有機權遇事能談言微中酉戌之際有大盜高三倭者官兵莫敢近所性往說之三倭立散其衆詣城中降里中人卽素有城府與人冰炭者見所性無不立化也同人咸比之邵康節以爲性情作用皆近似至於人讀易書難所性讀難書易則又與宋之西山可比肩稱二蔡也

段 麟

麟字又襄武進人諸生少聰穎從孫慎行張瑋游彙經史百家論說纂百餘卷名曰瑤笈凡天文五行輿圖典禮悉綜核精粹不諧於俗坎珂以終

朱二采

二采字立人號復亭武進人詩薄風騷而躒漢魏出入鮑謝高岑李杜之間發之性情本之忠孝貧困不遇以客授終其身所爲文多悲憫之思亦明性

道之學平生信而好古以封建井田爲必不可復行自律曆禮樂學校貢舉田賦兵制以至救荒弭盜河漕之得失古今之盛衰靡不貫穿於胸臆而一發之於文辭尤長議論卽有創解皆准之義理如人意中所欲出雖博大未及亭林梨洲而守先待後隱以自任

龔百藥

百藥字介眉號瑯琊武進人順治三年舉人以墨誤廢學問淵博下筆數千言性落拓不事生產詩歌倜儻與董以寧鄒祇謨陳玉璣稱毗陵四家

呂宮

宮字長音一字蒼忱號金門武進人順治四年殿試第一人授祕書院修撰累官宏文院大學士太子太保立朝尙氣節雖持大體不立異同獨辦流品於前明闡黨屏之尤嚴撰述甚富授門人吳侗校理遂失之

案先生文字亡佚不傳從來搜輯鄉邦文獻者無由得先生隻字近見吾鄉王氏所藏行書長幅書五言律句一首曰野外逢迎少柴門落葉稠人閒不掃室客到始梳頭且爲烹茶坐還因看竹留登臨如有意更上水邊

樓附記於此以俟纂錄

莊回生

回生字玉驄號澹庵武進人順治四年進士官至左庶子兼侍讀負才名工詩古文善書旁及繪事山水小景荒率有筆趣亦秀發自舒胸臆不拘拘師法無一毫甜俗氣擾其筆端不愧文人本色

孫自式

自式字衣月武進人順治四年進士改庶吉士授國史院檢討嘗條奏巡方科場二事語極剴切又慨吏治日壞自請爲本縣令詔賜牛黃丸令歸里養疾人呼爲狂翰林

董文驥

文驥字玉虬一字稱侯又字玉帆號雲和又號易農別號雲癡武進人順治六年進士與舜民孝廉文友茂才稱三董並負盛名康熙四年因天變求言上疏請復舊章言甚切尋外轉陝西隴右道參議稱疾歸博學高才尤邃於禮經立論最精核工詩善書歸田後放意詩酒風流文采爲一時冠官御史

時以史事劾谷應泰世祖在南苑召對日暮歸慮夜行失道命侍衛導之舉朝歎爲盛事

薛信辰

信辰字執侯一字國符武進人順治六年進士仕至浙江布政使官廣東潮州府時參將郝尙久叛偪降不屈命斬者三潮民環懇乃繫於獄妻孥多投井死大兵至乃得免

張星瑞子祖錄 祖鑄

星瑞字玉符武進人順治九年進士任婺州推官折獄平允遷刑部員外郎歸里後杜門讀書貫穿經史工詩古文辭

子祖錄康熙九年進士直隸獻縣知縣祖鎬康熙二十三年舉人內閣中書癖嗜史漢兄弟才名相埒

龔廷歷

廷歷字玉成別號震西氏武進人順治九年進士官至湖州府推官好讀書類編天文輿地諸子百家書數百卷以剛正忤上官上官欲中某以法廷歷

不可爭之力上官意終不同廷歷憤不可遏以利刃自斷其喉未絕治得蘇罷歸益肆力古學

巢震林

震林字五一號兼山武進人順治九年進士磨勘被黜十二年復中式俱一百六十二名里中傳爲佳話工詩氣空詞達格老調高篇帙雖不富諸體各有所長五言尤勝文則自六朝以迄唐宋靡不涉其堂奧官至禮部郎中任員外郎時值世祖之喪滿漢典禮各殊震林參酌得宜爲大宗伯倚重凡廟諡山陵之制及聖祖恭上太皇太后皇太后徽號冊寶儀文皆震林所定癸卯秋聖祖諭廢入股制義止以論策表判取士下有司議議者互有異同震林獨昌言於衆曰今上聖學日躋功令新更是廢入股非廢經書也請以經書命論題僉曰然議乃定

唐振芳

振芳字久菴武進人順治甲午歲貢太倉州訓導以師道自任振衰靡端志趣曰官無崇卑在爲之何若耳致多士於實學時有胡安定之稱

黃 永

永字雲孫號艾庵武進人順治十二年進士官刑部員外郎以奏銷案罷歸嗜書至老手不釋卷名滿天下而守如處子所居小閣臨城河舟人曉發見紙窗熒熒則指曰黃刑部讀書燈也

黃 京 魯 釗 孫以鐔 毛羽宸

京字初子武進人永弟工詞其時又有魯釗孫以鐔毛羽宸亦俱能詞

許之漸

之漸字儀吉號青嶼武進人順治十二年進士官至江西道御史性鯁直彈劾不避權貴後以事削籍事雪復官自以剛直寡諧遂歸所爲詩悲惻忠厚國門流傳以爲有風人之旨其臥而後復出也昂首自奮顧瞻宮闕感戀徘徊殆有一飯不忘君者會事格不果成乃日與其友吳漁山文酒相娛放浪公卿耆舊間棲遲浹歲倦而歸

吳珂鳴

珂鳴字慈淵武進人順治十四年舉人被劾詔命覆試三試皆第一特令與

會試中式舉人一體殿試成二甲進士世所稱天子門生也官至侍讀文章博瞻性好施與族有百餘棺未葬悉舉歸之先壟鄉里稱之

鄒祇謨

祇謨字訐士號程村武進人順治十五年進士事母以孝稱聰穎好讀書自經籍子史藝文雜著以及天文宗教百家之書細至古今人爵里姓氏世次年譜無不悉記如漢王校獵不至野盡山窮囊括其雌雄不止會有邑甲族以蜚語中之者祇謨一日散萬金立盡家四壁立舉酒自慰曰田園無存幸吾賓友尙在耳與王阮亭彭羨門游其詞修潔有花間遺意

劉維烈

維烈字惠卿武進人順治十五年進士以奏銷除名由是絕意仕進益貫串史傳尤工詩家居二十載循例開復官工部郎中鈎核簿籍黠吏不得干以私喜賓客座座上常滿遭父喪以毀卒

楊大鯤

大鯤字九搏一字曉屏武進人明修撰廷鑑子順治十六年進士官至山東

按察使善詞

董元愷

元愷字舜民武進人順治十七年舉人以名孝廉遭誣誤佗僚不自得激昂哀感悉寓於詞

蔣鑰

鑰字馭鹿武進人鎮國公高塞居奉天禮聘天下賢士鑰首應其選工詞

司旭

旭字東扶一字紅仙武進人其先居澄江大父脩甫設帳毗陵遂家焉其父孝緒夢絳雲垂地覺而旭生故名幼穎異讀書過目成誦工詞

莊媚生子紹平

媚生字玉川號懶庵武進人性高澹博學工詩與惲南田胡香吳諸人結浣花社寄情詩酒生平雅近淵明堯夫之爲人有以奇字僻書就詢者輒指示某書第幾卷第幾頁按籍索之略無錯誤時稱爲字通子紹平以文學世其家

陸苞允

苞允字竹孫更名度武進人八歲能文鍾惺賞之有鄴侯小友之目十四補縣學生文名蔚起明亡絕意進取徧遊閩越齊楚搜訪遺逸與憚日初馬負圖陸世儀輩講學里中平居訓子曰汝輩讀書明理足矣若慕勢榮非吾志也

薛

奕白 銘 楊二溥

弈字若昧武進人積學工書與白銘楊二溥唐宇昭俱以書名時號薛白楊唐是爲前四家銘字筠心亦工詩古文二溥字希之聖祖見所書佛經詔徵詣京已先一月卒宇昭傳見前

吳闡思

闡思字道賢武進人弱冠善繪能詩山水宗北宋五言出入中盛唐立言簡而託興長澹泊雋永庶幾章柳苗裔也

清代毗陵名人小傳稿卷二

邑後學張惟驥季易纂

惲壽平

壽平初名格字正叔一字惟大武進人少居城東號東園草衣生遷白雲渡號白雲外史既老號南田老人其別號有雪衣居士園客南田草衣叔子雲溪漁父東園東園外史南田抱甕客南田客東園客甌香散人雲溪隱漁東園生雲溪瀨漁等而南田之名特著生而敏慧父遜庵授之書上口卽能解義入歲詠蓮花成句驚其塾師十餘齡時隨父崎嶇閩嶺流落相失旗帥主某愛其聰穎欲子之遜庵偵在某所帥主媪酷奉釋氏將挈之過靈隱因屬寺僧善言誘接指此子慧根極深惜福薄壽促宜令出家卽日剃染留寺中媪泣而去既歸遜庵督課經傳先儒之書不稍貸壽平之澹靜高逸蓋本家學爲多事父至孝先意承志數十年無怠容家無遺貲恃筆墨以供世之知壽平者亦多以其畫畫筆得於天性少工山水尺幅千里烟雲萬態多仿黃

鶴山樵既與王石谷交石谷筆意極相似壽平顧而戲曰兩賢不相下君將以此擅天下名吾何爲事此乃作花卉寫生含苞怒放殘英半墮重跗疊瓣渲染皴裂多出意匠尤善繪徐崇嗣沒骨法間作一蟲一鳥傳神阿堵刻欲飛動而題語書法兼工有南田三絕之目婁東王太常聞壽平名屢遣客招致而壽平方出遊所至傾慕虛館爭迎迨往而太常已病矣喜壽平至至榻前一握手而逝商邱宋榮開藩於吳禮聘爲布衣交親玩壽平下筆設色凝思神妙嘗語人曰憚南田畫吾暗中摸索能辨之世多贗作其至處要有必不能贗者爲名人嘆賞如此身沒未久一縑之值數十金其時以爲價已重矣以迄于今未三百年一縑之值數千金蓋不獨以筆墨重重其人也出遊歸裝每致數百金家人散漫輒隨手盡贗壽平筆墨者或致富而壽平無以爲家其於詩選意必幽擇辭必鮮俗塵凡語自然不侵其筆端而涉於身世之感悲涼衰颯寄托遙渺意致深長有未易爲外人道者書學褚登善得其神髓世稱爲憚字康熙二十九年庚午卒年五十八

近見吾鄉王氏所藏先生早年手書詩冊詩多在靈隱山中作款署筠谷

樵隱格乃知先生早歲有此別號也附記於此

陳玉璣

玉璣字賡明號椒峰武進人康熙六年進士官中書舍人以戊午北闈事黜革家居拂鬱益發憤著書撰史論數百卷少有大志凡天文地志兵刑禮樂河渠賦役諸大事莫不講求爛熟言之娓娓賓客輻輳應酬旁午以至彈琴投壺嬉戲之樂靡所不爲偶有所觸發爲詩文旬日之間動至盈尺見者遜其俊才比之劉穆之云常讀書至夜分兩眸欲闔如線輒用艾灼臂久之成痂每一顧益自奮其詞寄托遙深體裁鴻麗誠能黼太平於盛世也

楊宗發

宗發字起文武進人負奇落落家貧骨立意氣灑然殊自得也問學於惲遜庵同學者數人宗發獨猛進辨難滾滾常自持然否不可奪年四十二以居憂刻苦成疾卒所著古近體詩若干首小詞若干首制藝并雜體文若干首其文似九辨諸篇目所見耳所聞都非我有大類不食烟火語其詩逸才縱發體尤高古導源於騷不肯道漢魏以下隻字容若傲物而多隱行父母前

織悉不假手於人筆耕良苦而常急兄弟之急一日夜行過橋聞下有聲視之則盲且被酒者溺於水也援之起解衣衣之送至其家踰半里許而歸婦病或贈以參餌不受強之乃可尋檢衍中所藏古硯密置其人案頭而去其臨財不苟如此此顧寧人所以稱其行身甚狷文筆甚狂者乎

陳鍊

鍊字道萊晚號半緣居士武進人諸生居北郭外距城五十里而遙其地名西林學者因稱西林先生系出雲陽十八世祖東卽宋建炎中以摘奸被禍者也數傳後遷於毗陵鍊讀書過目成誦不俟講解大義盡析於學無所不窺而其指歸必宗朱子自有宋諸儒下逮元明其書靡不研究凡持論與朱子異同者皆參考以衷於是詩能化故爲新點俗成韻發源於少陵昌黎間闡入子瞻魯直妥帖排纂不以盤帨爲工年七十一卒康熙五十四年乙未也

胡香昊

香昊字芋莊號竹紆武進人生而穎悟少治舉子業見應試者爲吏卒檢驗

喟然曰士不可賤奈先自賤何遂棄去專力於詩古文於漢魏六朝三唐盡得其源流根柢家貧資客遊以供菽水自己酉至辛酉十餘年間凡洞庭彭蠡匡廬赤壁之勝吟眺殆遍得詩最多不自收拾散佚無存歸里後卜居東郊偃仄一椽僅可容膝有隙地數弓擬築室三楹顏曰香草堂乃家徒壁立營之二十年未就江西羅飯牛吾邑憚南田爲作香草堂圖桐城江磊齋跋其尾曰晝裏雲山供大隱意中邱壑屬長貧蓋紀實也性簡略不治生產賣文錢半入酒罈雖極窮困意陶然自適無戚戚容每謂人曰詩須令人不解作詩卽此事定知非詩人蓋深味乎坡公之言俗子目瞠舌橋真不解矣一生不慕榮利樂琴書似陶靖節自然高邁口不臧否人物似阮嗣宗脫略簡易無賢愚少長皆傾接似邢子才以周易老莊自娛他所不屑似東臯子與田夫野老酣嬉淋漓極飲大醉似石曼卿年七十三往來城市與諸少年角逐爭先一日攜錢市魚墜其一於地俯而拾顧漁父一笑而逝

董大倫

大倫字數五一字疇敍號叔魚武進人諸生以寧次子四歲而孤又二年鄒

太夫人令其就塾讀書必數十過始成誦塾師以魯目之然所誦習輒記憶且通曉大義其外舅莊天覺曰此子必能讀父書者及長偕兄漢求執經虞山錢湘靈之門遂工詩其詩出入中晚唐兼宋元諸名家之勝尤工詠物臥病太夫人禁其苦吟而中心養養見獵彌喜枕函牀第間私置筆硯得句輒蘸墨書之新穎沉鬱勝於以寧昔人稱王獻之善隸藁書骨勢不及其父而媚趣過之梅坪之過正誼堂正在骨勢也以貧故客遊山左得疾南歸盡鬻先人所遺田畝以供藥餌猶不足適兄漢求以羸疾卒自傷隻影病益篤遽與兄相繼下世俱乏嗣嗚呼古稱詩能窮人以故東野貧長吉夭方千羅隱孤魂及第有一於此人猶痛之大倫兼茲數者又卒無嗣此所以三復其詩而泣然不知涕之隕也

唐惲宸

惲宸初名杜字靖元別字芑野惲宸其庠名也武進人諸生甫就塾則日課以五經左史故於古爲邃嘗手評史記六七過錢湘靈謂有史記癖詩尤刻意深造以離騷爲宗甲戌乙亥間偕胡芋莊陳道棗董叔魚舉院花會祀杜

少陵以詩相酬唱毗陵之人一時號能詩者必推數子潦倒諸生中鬱鬱不得志遂患風疾卒年五十五性豪邁喜飲酒既醉則歌呼泣下人多不得其故嘗賦大招夢壓諸詩骯髒抑鬱不可一世其寄托於此可見初年十四患病父命以陳壽三國志自娛至帝魏僞蜀憮然太息乃有意訂正成季漢史四十三卷友人憚雷門極稱之謂義例本春秋文筆類史公書始成人議荆州不宜全入漢疆域建安二年與吳分界則長沙江夏桂陽三郡屬吳南陽又屬魏漢所有者南郡零陵武陵耳憚宸唯唯其人夜夢有語之者屬漢是也何改爲明且以告因笑曰芑野書通神矣

張子畏

子畏武進人憚南田甥工花草得舅氏法宋牧仲撫吳時得黃筌全樹杜鵑花圖花約什伯餘神彩煥發望若火樹插空氣蒸蒸欲動異寶也延子畏摹副本圖成牧仲以爲亂真

董瑜

瑜字清溪武進人精繪事見推於憚南田幾與抗行宋牧仲中丞欲招致之

不住

王之仕

之仕武進人高才不偶工畫山水及蟹與憚壽平齊名

朱嶼

嶼字與山武進人畫與南田齊名南田長設色與山工淡墨又善畫龍

趙申喬弟申季 子熊詔

申喬字慎旃一字松五自號白雲舊人武進人康熙九年進士二十年授商邱知縣釐畝稅戶給照單書四至隱占者許自首荒者除之歲饑捐俸煮粥食餓人不足括縑數匹易米以濟鄰縣民踵至嘆曰使吾縣得此好官吾煩遠涉耶二十五年授刑部主事遇事強直會湖廣有獄失入引律駁還得減死三十三年遷員外郎引疾歸四十年以安溪李公薦特旨召見授浙江布政使受事三日首革南糧布袋之弊故事發兵糧石給口袋錢四十歲費銀四千兩悉徵之民間至是照京倉例營兵自備口袋弊遂絕外營兵餉舊解府撥發申喬令歸本縣支給省費不貲在官常自家運米以食曰吾不欲以

口食累民也四十一年擢浙江巡撫自藩署移撫廨襍被一肩書數簾而已
奏築錢塘江口易海塘土以石將施工齋戒三日率屬赴江干爲文以祭忽
風狂潮大至浪搏人若弩注觀者奔避申喬屹立不動潮遽止跪禱願假數
旬以畢事嗣是潮不至者七旬而塘成已而塘外擁沙成洲可數里自此潮
不爲害九月湖南鎮筸士民叩闈言紅苗反天子命申喬往湖南會同侍郎
傅繼祖等察勘遂調偏沅巡撫四十二年秋疏請征紅苗爲先撫後勦之計
天子命粵黔楚三省提督會同湖廣督撫進勦十二月自龍椒洞分路並進
斬千餘降其寨三百有奇紅苗平先是天子南巡申喬朝蘇州行在天子以
湖南道遠而官吏私徵加耗倍他省特頒諭旨申飭申喬還建亭勒詔書檄
告屬吏且言澄源端本必有巡撫始稍有不法官民等卽共聲其罪於是屬
吏惴恐革一切私派定額漕米斗斛官爲收解驛傳馬夫銀於本州縣坐支
又革鹽商規例酌道里遠近平鹽價請以上年兵米所餘抵春夏餉有餘折
銀解部永停預征之令見屬吏必霽容使得盡言利弊惟疾惡如仇不少貸
尤加意文教遇學道必以清慎相助四十六年授左都御史及去湖南也士

民夾道焚香號哭自長沙至岳州數百里不絕各屬多建生祠祀之入都疏言河南瀕河荒稅宜豁且請勅撫臣凡河水衝決及浚河築隄所占民田皆除其稅五十二年遷戶部尙書商人馬維屏呈請納銀萬兩交部領大錢易小錢送局改鑄下內務府戶部會議將許之申喬言收換小錢有司職也商人圖利恐藉端擾民請勿許特旨允之在部矻矻治文書勾稽錢穀無寧晷事關大體多與同官異議以是不悅於衆五十九年卒於位年七十七賜祭葬如典禮諡恭毅入祀賢良祠雍正間追贈太子太保平生清介剛直不可以私干論學以不欺爲本爲政嚴厲發奸摘伏如神名重天下而楚人尤稱頌之當吳三桂據衡州時民苦征役申喬至始大減火耗免徭役一切無藝之征悉罷民困獲蘇雖婦人童孺無不知有趙撫院者百數十年後猶未衰也

申季字行瞻康熙三十六年進士任遷江令革除科派禁獮蠻劫掠及豪強債利舉卓異改授編修異數也督山東學政廉慎自矢評文不假手幕友以勞瘁卒於官

長子熊詔字赤侯一字裘萼康熙四十八年殿試第一人及第授修撰入直南書房因同官訐奏記注事落職仍留供奉五十七年以大臣子弟從軍肅州出私財濟運丁父憂歸未匝月以毀卒平生篤恩義工詩文通籍後肆力天文勾股之學所著述多爲時所稱

臧琳

琳字玉林武進人諸生學問淹雅別白精審以實事求是爲宗其教人先以爾雅說文曰不識字何以讀書不通訓詁何以明經其治經也必以漢唐註疏爲主其於詩禮二經王肅私竄以難鄭康成者尤能推見至隱太原閻百詩稱其深明兩漢之學

楊祖祥

祖祥字充閭號匏村武進人考授州同武英殿纂修圖書集成議敘知縣工詩精花卉得蔣南沙法賦色妍靜張庚畫徵錄誤作湯祖祥

龔士薦

士薦字彥吉號復園武進人諸生天才雄放弱冠游京師名動公卿年少工

詩堅蒼古鬱得杜陵遺意

龔士燕

士燕字武仕武進人少穎異能文講求性理發明蔡氏律呂新書推衍黃鍾圖徑開方密率諸法而於元郭守敬授時曆尤得其秘如求冬至時刻上推百年加一算下推百年減一算以爲歲周三百六十五日二十四刻二十五分之內滿百年消長一分是爲萬分中之一非萬分爲日之一日也核之春秋日食三十七事多與符合又如推晦朔弦望以太陽之盈與太陰之遲以太陰之疾與太陽之縮皆相併爲同名相從以太陽之盈與太陰之疾以太陰之遲與太陽之縮皆相減爲異名相消乃得盈縮遲疾化爲加減時刻之差以此加減朔望之大小餘分得定朔弦望諸時刻至盈縮遲疾郭守敬平立朔平立定三差理隱數繁審其機括繪圖以明之又如赤道變黃道之法謂在二至後者以度率二零八六五除赤道積度變爲黃道宿宿在二分後者以度率二零八六五乘赤道積度變爲黃道宿度凡此授時之緒引伸益明其餘月離五星等法與回回西洋諸曆遇有疑難無不洞悉至日月體徑

有大小交食限數有淺深具見其奧且悟唐順之弧容直闊之法以排求太陰出入黃道在內在外不離乎六度自是一應七政氣朔交食諸端按法而推百不失一同時如毛貽哲楊爾京楊道聲徐紫威皆相與往還講論康熙六年詔募天下知曆之士於是士燕入都其時欽天監用大統曆七政多不合天奉旨在觀象臺每日測驗而金星比曆差至十度士燕脩改古法乃據七年所測表影推測太陽盈縮又據日測五星行度考其遲疾彼此推求加減氣閏轉交諸應測驗皆與天合蓋其法亦本郭守敬太陽爲氣應推冬至與日躔用之太陰周天爲轉應朔望用之又有交應推日月食用之合氣盈朔虛之奇零爲閏應推閏月用之此外有合應推五星用之脩改諸應取順治元年甲申爲元以應世祖撫有中夏之祥欽天監名爲改應法旣改氣閏轉交諸應復改遲疾限及求差諸法又改冬至黃道法日出分依步中星內法又盈縮遲疾無積度月食無時差一一訂定脩改用推以前日食皆與天合初漢監正楊光先崇信大統曆繼復欲用回回曆士燕各如其術推七政示之最後示以授時七政光先心折焉監正交章保薦八年曆書告成奏對

武英殿授曆科博士時有薦西洋南懷仁利類思安文思三人於朝考其實測諸術既驗且捷咸以爲便遂定用西洋法而古曆卒不行十年以疾歸

薛 璿 曰 萬 楊喬年 唐字肩

璿武進人好學工書與白萬楊喬年唐字肩齊名稱薛白楊唐後四家字肩字若營宇昭從弟皆荆川玄孫也亦工詩

△錢以爵子維岳

以爵字子祿武進西郊人系出吳越武肅王之後生而敏慧有大志師常以大器目之稍長力學然試輒不售卽棄舉業習岐黃師同郡葉君某講求醫理參酌時宜不少懈及壯學成名震遐邇嘗有自粵來求治者當時有扁鵲復生之目後數年葉師卒而葉母存諸子俱未成立君出診悉以西北酌金歸葉母贍其家以終身君爲人不事修飾冬一裘夏一葛此外無長物性好施與通財故舊卽素不相識而偶以緩急告者無不各如其願歲時祭祀極誠盡敬豐儉適宜每遇忌辰輒愴然不樂於是知君之孝純君之行篤君之志堅立身處世足爲世法也

維岳字清時子祿爲世名醫清時能繼其業聲名益振性穎悟工詞翰不屑爲制舉業嘗曰讀書所以明理窮經所以致用制藝爲科第計耳豈盡人科第哉何必老死帖括中也於是專意內典素靈諸書昕夕講求學有深造念世多異疾非一人見地所能到且善宜與人同乃集諸同道設局小茅山施診給藥歷歲不倦乾隆五十年郡中荐饑當事開廠西倉煮粥賑餓人穢氣薰蒸釀成疫癘清時親往遍爲診療賴以全活者甚衆事詳郡縣志中先是子祿早年喪偶續娶清時在髫齡卽得繼母歡長更友于諸弟平素澹逸年五旬卽以家業付其子植花木攜酒厄書卷以自娛至七十餘無疾而逝長子五臻孫鳳吉鳳彩俱能傳其業

楊大鶴子椿

大鶴字九皋一字芝田武進人明修撰廷鑑子康熙十三年進士官至左諭德博覽典籍工書九歲父病杜門不出賦謝客詩十章人比之李賀員半千才情綺逸偶作小詞不減晏小山落花人獨立微雨燕雙飛之句所選劍南詩鈔風行海內

椿字農先大鶴子康熙五十七年進士官至侍講學士祭告秦蜀歸奏途次見聞七事多所施行進經史講義虞書勅天之命章援引傳註推廣大義略言聖人之於臣惟論其理之是非不計其辭之工拙惟鑒其心之誠僞不問其事之有無臯陶戒舜曰無教逸欲有邦益曰無怠無荒舜豈教逸欲而好怠荒者哉二臣言之不以爲忤帝舜受之不以爲非有虞之治所以不可及也蒙帝召對往復推闡一時傳爲盛事性矜慎刻苦弱冠卽以古文鳴於時淹貫經義不襲講學陳言躬行實踐髦而不倦平生以該洽受知所輯書校理精密三館推重之著有孟鄰堂文鈔十六卷

楊士凝

士凝字妙合號笠乘大鯤孫康熙五十六年舉人山東單縣知縣工詩詞

錢二白

錢大經 錢大猷 錢大鏞

二白字天逸號東臯武進人康熙十八年進士福建福安知縣福安土瘠民貧二白爲之清丈分界限立規程隨田制賦賦役悉均丁父憂歸服闋補河南伊陽縣荒簡甚於福安日與賓僚搜奇探古尋歸構半溪書房疊石鑿池

吟嘯其中工書及詩年七十四卒其宗人大經字愷存大猷字典存大鏞字元存並饒風雅稱清門焉

周清原

子嘉梓

清原字浣初一字雅楫號且朴又號蓉湖武進人康熙十八年以監生召試博學宏詞授檢討修明史分得于忠肅傳同官有以易儲事議之者立辨其誣議始定官至工部侍郎卒賜祭葬大學士馮溥見其應試諸作目爲奇才與湯文正論學有當越數年復相辨論視前說加進官侍郎時聖祖南巡布衣龔士烱獻歷代年表一書所載至隋而止乃命清原重修未歲事而清原卒復詔內閣學士王之樞踵修而清原子嘉梓佐之乃相續成編上起帝堯甲辰下迄元順帝至正二十八年戊申御定名歷代紀事年表共一百卷

龔勝玉

勝玉一名眉望字節孫武進人僑寓宜興與陳其年齊名官奉天錦州通判日集生徒耳提口授從遊者常數百人遼左人文蔚起

莊絳楊玉

絳字丹吉武進人幼穎異讀書五行俱下以高才生補縣學生員游京師聲譽藉甚以文章器宇見重於大學士王熙疏以宮僚薦格於例遂寢又欲以他途進之以老謝歸參訂經史凡天文疆索九流百家之書靡不綜貫尤熟明掌故作文援筆立就同時有楊玉字雪度者工詩與絳齊名

蔣金式

子鴻翻

姪文元

芳洲

敦淳

金式字玉度武進人康熙二十三年舉人考授內閣中書任懷寧教諭年已六十餘諸生知其宿學講業無虛日縣試初僅數百人後乃踰倍工詩古文辭歸田後益事著述無間寒暑趙申喬與同學臨沒以必得金式文誌墓爲屬子鴻翻字紹孟康熙四十五年舉人博覽典籍下筆千言與人言議論風生從子文元芳洲敦淳皆親所指授並有文名

陶自悅

自悅字心兌號艾圃武進人康熙二十七年進士官至澤州知州性敦厚精於經學爲政寬猛相濟有古循吏風澤州俗侈喪葬輒破產以故多停喪十餘年不葬自悅著令務省約使速葬違者坐鄉保數月而畢鄉以產母爲龍

母婦生子不育爲旱魃衆擁婦至露所袒括髮以冷水沃之得雨乃止死者相繼自悅治以重辟俗乃革去官之日民遮道留泣者數千人後常私祀之

龔雲起

雲起字仲震武進人以詩名天下

陳聶恆

聶恆字曾起一字魯得號秋田武進人康熙三十九年進士授廣西荔浦知縣荔浦多獞獠姦民挾以煽亂聶恆單騎抵其巢諸酋羅拜因諭以禍福令出荔民之懼獞穴者擢刑部主事改檢討工詞

徐永宣

永宣字學人號茶坪武進人康熙三十九年進士授戶部主事天爵自貴不就選人肆力於詩古文辭與王士禛朱彝尊相頡頏大學士熊賜履以其詩文呈進召來京供職未赴卒其詩全得力於東坡與湯自奇莊令輿爲詩友王牆東極稱道之謂其於晚唐風韻確有會心也著有茶坪詩鈔四卷

錢名世

父養浩 兄濟世

名世字亮功武進人康熙四十二年殿試第三人及第官至翰林院侍講因避時忌去官遂廢不復出其詩脩然自得父養浩縣學生員兄濟世在庠並有聲人比之宋三蘇

唐執玉子孝本

執玉字益功號薊門武進人字全孫康熙四十二年進士仕至都察院左都御史兵刑兩部尚書署理直隸總督雍正時出師西征執玉調餉配卒備極辛瘁歿於任所貧無以殮爲德清令時有殺人犯匿其座主徐侍郎所犯其族人也隸捕不獲執玉登徐門置印徐懷曰某聞不得其官則去門生從此去矣徐立出犯置之法一邑皆悚暨登朝掌總憲朝宁肅然出任疆圻名與田文鏡李衛埒而寬宏持大體過之

孝本字念淳康熙五十九年舉人仕至撫州知府宰臺灣時悍弁結諸無賴設鴉片館於曲房羣不逞倚爲狡兔窟孝本突於夜半密召鄉勇踔館猝其魁行數里俄有脫帽短衣者數人持械直犯謂所捕乃營兵縣官不得治孝本下車并擒之旦武弁率營兵數百輩譁而至謂縣官乃敢執千總大無禮

吾等將致命孝本佩劍印升堂洞開署門傳命曰朝廷自有法吾擒刦犯之
爲亂者爾等敢助亂譁者乃沮喪愕眙莫敢動

莊令輿

令輿字蓀菴號阮尊武進人康熙四十五年進士官編脩天姿穎異下筆千
言立就尤工詩主浙江試所得皆一時名士旋告歸父母俱存色養膝下好
汲引後進網羅散佚選六逸詩梓行之令輿在康熙三十五年北榜中式舉
人名蔣璣因借籍黜四十一年以五經欽賜舉人五經定額取士自令輿始

程彥

彥字松臯號晏裘武進人康熙四十五年進士授陝西靈臺知縣有善政軍
興轉餉趨事常先他縣軍中不廢吟詠詩文有天趣不喜雕琢歸後與陳鍊
胡香吳相唱和

惲鶴生子宗洵 宗和

鶴生字皋聞武進人康熙四十七年舉人在秦中晤謝野臣語以顏習齋爲
學大旨心善之及至蠡縣訪習齋習齋已先沒矣乃從李恕谷求得所著書

讀之自稱私淑弟子因棄其學而學焉與恕谷書曰讀顏先生書爲之心開目朗如靈霧豁而天日皎也如泥得浴如塵得刷而身爲之輕意爲之爽也尤服膺主靜二字以爲聖賢特旨而深愧未能恕谷得鶴生甚喜謂可與明行斯道所著各書悉與參定取其說之是者與可商者入之所訂平書及所著各禮鶴生亦錄存其副仿恕谷共立日譜考究身心功過後每相見輒相與互證得失嘗規恕谷惡惡太嚴不和於流俗恕谷拜受每鶴生寄書至恕谷再拜然後啓讀其重之如此鶴生言南旋以存學示人雖極倔強者亦首肯知斯道之易行恕谷喜曰顏先生之道南矣鶴生在蠡招恕谷子習仁教之讀書及南旋後遣其二子受業恕谷門下長宗洵字廉夫康熙六十年進士次宗和字敦夫

卜俊民

俊民字方嘉武進人康熙五十一年進士負異稟就童子試卽兼五經會試中第一同邑趙申喬爲總裁下第者有浮言覆試聖祖臨視俊民展卷疾書漏未移刻書義經義並就天顏溫霽入翰林名噪一時尋卒著述甚富

劉於義

於義字喻旃號蔚岡武進人康熙五十一年進士官至吏部尙書協辦大學士加太子少保卒諡文恪初在翰林時文譽甚著聖祖晚年學益懋翰林官凡有擬撰慮不稱旨輒推於義爲之輒報可以故掌院學士倚若左右手聖祖知之而以官資淺未大用同官以於義職於文而莫之奇也世宗登極屢遷至吏部左侍郎振山東饑奏發倉粟百餘萬石白金十萬旋拜協巡撫事以侍郎督直隸河道晉刑部尙書攝直隸總督事直隸盜犯依律不分首從皆斬時有大名劫盜百數十人於義詳訊係飢民借糧爭奪非積盜比奏請得未減自坊官至列卿開府纔八年耳所至能宣上德意以仁恕爲心而性沉密習勞苦能辦大事洵足光耀朝廷且爲詞臣增氣色者也乾隆三年挂吏議罷官尋起直隸布政使司遷福建山西巡撫召爲戶部尙書四年晉吏部尙書協辦大學士高宗素識於義旣廢復起官階益進於義之不敢因老病乞骸以此其督陝西時監修陝西通志敘述考證皆有依據

莊楷

楷字書田武進人康熙五十二年進士官至國子監司業少有能詩聲里中人目之爲三田謂南田惲處士畫秋田陳比部填詞及書田詩也初以召試高等與書局纂修迨簡入翰林年已及艾其時西崖樓村初白三君子方主盟風雅題襟挹袖不以後進視之其詩徧涉唐宋而尤辦香眉山蘇氏歸田後耄而好學次第註釋羣經而亦不廢吟咏其於羣經雖無成書而莊氏經學實權輿於書田也

孫應榴

應榴字子房武進人初與是鏡爲程朱之學習靜坐惲鶴生謂靜坐近禪示以李恕谷後集大學辨業顏習齋年譜諸書始而疑後漸服至感慨處輒淚下擬北上拜謁以資斧不給乃北向拜恕谷爲師立日記自省旣而讀恕谷題王崑繩省身錄一則慨然曰數載景仰未得遂願見先生之志今以斯言自省庶幾如見也恕谷見其日記謂存養習行之功與習齋爭密而見於文辭者與鶴生爭敏始鶴生言南中信習齋之學者四人今見子房卓卓如此信天之不喪斯文所關非小惜年僅四十而卒

湯自奇

自奇字述庭號鳴友武進人弱冠游京師聲名藉甚有某親王延致與諸名士分題授簡作西山賦三宗考揮灑萬言王驚異謂鄒枚復生以省親歸莊令輿徐永宣皆呼爲詩老又工詞及畫

高尚正

鄒嶧先

屠曜采

尚正字蘭泉武進人善弈稱國手年九十餘耳目猶聰明其時有鄒嶧先年十三卽以弈遊京師與過百齡盛聖逢齊名又有屠曜采以弈遊大江南北罕有匹者惟宣汝庸年小於曜采而名相埒

蔣理正孫良

理正字紫真武進人少孤以孝行聞與丹徒張九徵同學遂補丹陽學生常依外家荆氏盡發其所藏書讀之後客崑山徐氏傳是樓繙閱殆徧究心理學自漢魏以迄宋元明靡不搜討隨筆鈔錄時有心得尤邃於醫年逾七十疽發於背導氣納養數月復初遠近爭相延致遇危症諸醫束手每別出新意治之立愈嘗應巡撫聘得數百金出而訪友友方死貧不能殮卽出金經

紀之晚歲益灑落年九十五卒孫良字秋泉以祖籍補丹陽學生性恬靜能詩文書畫

顧秉信章大士 石永芳

秉信字確士武進人賦資端敏弱冠卽講求正學李顥主延陵講席往觀而慕之尤悅陸世儀所著書師馬負圖益淬厲研索不懈凡曆象方輿農田水利漕運兵防悉貫通焉厚訥寡言矜重手筆然或叩之從源及委井井不窮其有本如此巡撫張伯行聞其名敦聘不往未幾卒於家其時又有章大士石永芳大士字我任少慕包拯海瑞之爲人及長研求理學好靜坐而與人談忠義事鬚髯輒張商確學問細入毫髮詩豪宕感激皎然弗欺其中永芳字桂祥銳志求道與秉信相砥礪講學習禮反躬實踐人稱端士

湯誥

誥字公綸號紫庭武進人諸生遊豐沛間顧大申分司夏鎮河道聘主鎮山書院從者輒數百人誥以生徒過衆恐懼黨禍辭歸未幾大申果遭彈劾人服其先見初刻苦爲詞章後師事馬負圖陸世儀於天文地理河渠兵屯靡

不窮究

錢

理章

惟

段玉涵

荆振翔

張天申

楊通佺

曹湖

理字紫曜武進人工詞又章惟段玉涵荆振翔張天申楊通佺曹湖俱以能詞名惟字無恤通佺字聖期湖字二隱

鄭朝統

張南溟

朝統字建三武進人弱冠以文名尤工詩與胡香吳張南溟相唱和南溟字九鵬清介不與時俗伍不事舉業耕釣城隅委巷席門青燈課子人比之茅容徐穉

呂

師子驥

師字夔典武進人幼失明而穎異過人經史過耳成誦比長凡律算醫卜音韻之學入耳心解嘗範鐵爲格方廣三分許鑿厚紙爲方圓曲銳陰陽歧出之形黏布其間以指索之卽知何韻好聚書所度有一定處一索卽得能圍棋以仰覆代黑白管弦絲竹非所好而爲之輒工推爲奇士子驥字千里敦行孝弟克守家範

趙侗數

侗數字景維武進人熊詔子才幹敏穎康熙四十四年聖駕南巡以諸生獻頌召修子史精華等書除湖南臨武知縣臨武民謠雜處椎牛盜狗溺女鬻妻甚有子訐其父者乃詳曲訓導並著令民麗輕法父兄爲請得勿治悍俗以變歷湖北襄陽知府浙江寧紹台道改鹽驛副使所至有政績以屬吏事罷歸

瞿朝晉

朝晉字惟一武進人歲貢生爲經世之學輯保甲全書其自敘略曰保甲之法深得先王疆理遺意十家教令責甲長十甲長教令責保長各保長教令責鄉約正副有不率教令者官得治之其長教令有功官加旌異有過則加懲罰由是各長所屬歲時覈實勸耕織督樹畜舉鄉約設社倉開義學解爭訟詰匪類嚴守望事舉功有所屬事不舉責有所歸非特爲弭盜善策乃化民成俗之本也書凡數萬言可見諸施行

蔣梧

梧字奉招武進人遊京師有詩名康熙五十七年編修徐葆光奉命冊封琉球延之偕行琉球俗好詩文書翰梧援筆揮灑有求必應各欣躍而去彙賦詠成帙名曰海外吟怡親王聞其名延訓諸王子範以規矩王甚重之慷慨好施戚黨多待以舉火者而建社倉一事尤爲人所利賴

管滋琪

滋琪字奇玉武進人諸生毗陵之管世家華渡滋琪自其大父紹寧貴徙居城中故饒於貲好園池竹石之勝所爲梅花書屋一樹一石皆手自灌植構結不以爲勞所交多一時知名士同邑龔仲震董文友邵青門數往來其家每一過從脫帽酣飲談諧歌呼竟日夜不厭每至丙夜僮侍廝役縱橫頭觸屏風睡而滋琪獨追陪無倦色其好客如此喜作畫爲山水木石皆有致亦工書外若跌宕而中刻苦思以功名自奮四試於鄉不售邑邑致疾卒年三十二康熙三年甲辰也

白太官

太官武進人康熙間以勇聞力能扛五石之鼎可一躍踰重垣一日有少林

僧過訪太官夙震其名恐兩賢之相厄也詭辭以他出而已託灌園之老者
澹菴留僧取巨竹根以二指揉之並縷縷如絲細以炊僧私怖其僕猶爾因
婉謝以去及其既行視廳事方甑四隅皆碎裂無一完者則向僧閒步之所
致也太官亦愕然

清代毗陵名人小傳稿卷三

邑後學張惟驤季易纂

蔣汾功弟驥

汾功字東委陽湖人雍正元年進士性純孝喪母哀毀杜門著書有文譽以古文名家通籍後以知縣分發湖北後官松江府教授課士有法多所成就平生屏聲色斥貨利經明行修頹然長德每自云內重則外輕膏粱文繡自不敵吾真樂常薄唐韓愈上宰相書性好書卷自少壯至老道途藩溷疾病寢食不少輟尤邃孟子文章原本經術根抵醇厚

驥字涑塏武進人諸生少穎悟好學與兄文元芳洲鵬翮汾功俱擅文譽邑人爲之語曰里中五蔣後來居上四人先後成名獨驥困阨不遇乃發憤注楚辭徵引精覈游京師于大學士徐元夢坐賦詩援筆立就怡親王重之徵爲上客謝不往歸以經學教後進多登第者年六十八卒

鄒光濤

光濤字琢其武進人雍正元年進士五歲屬對如響九歲誦五經及長覃精研求學大進官福建道御史以言事落職益肆力經籍鬻產購書

徐崑

崑字國山晚號遯齋武進人雍正元年舉人三年補內閣中書以同知分發浙江補溫州府同知署湖州府同知擒巨猾雌老虎等盡殲其黨擢金華府知府金華屬邑滯獄積至二百餘當盛夏日坐廳事剖決之兩月而竟湯溪民鬻十九狗妹兄弟有寡嫂攜其兄之孤嫁於魏七十歲朝狗妹往視其嫂與孤俱無有也歸告十九七十以其妻子俱溺聞官十九具狀致辯令坐十九兄弟以誣崑覽前牘疑之乃託爲他縣尉奉新守令清釐保甲行至其鄉得其前後掠殺妻子諸狀歸訊七十一鞠而服而崑遇大計竟以浮躁鐫級去之日老幼扶持送至蘭溪五十里外不絕遂佐甯海權平原令移曹縣引病歸詩古文雅潔迴出時輩

潘思榘

思榘字絜方號補堂陽湖人雍正二年進士選庶吉士改刑部主事遷員外

郎升郎中出知南雄府擢海南兵備道調糧驛道升按察使遷浙江布政使擢安徽巡撫調福建巡撫乾隆十七年卒於位年五十八入祀京師賢良祠特諡敏惠少勤學慨然有志於用世性敏決明法律練習吏事力持大體汲汲以宣朝廷德意經國澤民爲務故所至辦治而輿望歸之其在西曹讞獄常至夜分飢則探懷餅淪水而食每隨尙書入奏事世宗嘉之在南雄大水將敗城禱神危橋俎未徹而橋圯露宿埤塊間督吏卒縛救溺者在瓊深入五指山安輯黎衆劾鎮將郡守之殘吏人者秉粵臬飭綱紀端風俗揃貪蠹鉏豪猾所部肅然而理冤獄尤多守藩時浙東大水壞田廬漂人畜無算乃出臨錢塘江收流棺瘞浮屍發運銀粟分往賑恤其秋蕭山民匈匈渡江環撫軍門告饑思饗曰民飢當哺鬪則亂民也嚴懲之自是迄麥登無一人敢譁者其撫安徽也未蒞任聞河決淮淝鳳潁泗皆災思饗卽前後請庫廩百萬有奇拜疏親行督賑歸奏三策曰課農桑疏溝洫稽流移得旨俞允將次舉行而拜移閩之命矣閩爲嚴疆庶政繁委民情囂獷相尙以鬪訟盜匪數起思饗廉得其主名髮節而草薶之在閩四年餘一朝京師六蒙召對中外

知倚任益專早晚將期思築之枋用矣思築之所蒞以水利爲農田本嘗欲大治餘杭之南湖上虞之夏蓋湖餘姚之汝湖慈谿之慈湖以及皖北之安豐郭陂等塘澮澗淝黃茨沙澗諸河繪圖商功皇然爲斯民綢繆牖戶計皆以遷擢中輟惟修築寧德之東湖開良田萬畝復福州西湖漑其旁數千頃幸得竣居恆與客言嘗引以爲憾爲人厚重寡言笑臨大事能斷恤吏民若一體治公務若營其家愛士惟恐不及於世間嗜好泊如也故皋復之夕賓哭於館吏哭於次士哭於塾民哭於途卒哭於伍僉以中年奄逝未竟用世之志而爲天下惜也平生治經尤邃於易能探荀虞之旨嘗謂後世知有漢學者賴有李鼎祚集解存耳日閱註疏及徐氏經解出入一童抱筆牘自隨有得卽疏之嘗語學者曰學必求有用凡象緯方輿歷算水利農政何事不當留心詞章撰著抑未耳講求經濟一燈熒熒日事考訂論辯反復如老書生其虛懷好學有古人所難者也

謝 旻

旻字侶桐武進人官江西巡撫監修江西通志江西志卷帙繁而徵引瞻博

皆有典據釐訂具有體裁

楊方達

方達字符蒼武進人雍正二年舉人少凝重閉戶著書不事干謁喜施與規行矩步鄉里重之貫串經史旁及諸子百家無不採擇府縣交舉經學不應年七十九卒

秦宮璧

宮璧字龍光武進人雍正二年舉人性穎悟篤志實學肆力經史於天文地理諸書靡不研求工詩古文辭不畧羨於世俗之榮利而好究儒先之學歛之豐溪人吳邦佩聞其名迎至家使諸子皆受業其門宮璧所輯諸儒四書之說爲大全稱引最詳備邦佩與休寧金于莢共爲刊刻以廣其傳

莊柱

柱字書石武進人絳子雍正五年進士官浙江兵備副使工詩文善書

許元基

元基字方亨武進人諸生雍正初薦修古今圖書集成賜蟒授四川蒲江知

縣歷大邑大竹大足南川榮昌等縣知縣乾隆壬午高宗南巡迎駕賜緞

丁元颺兄名時

元颺武進人諸生幼號神童博極羣書尤邃性理性孝友父鼎西病危刲股進病立愈兄名時亦以孝稱相繼歿士大夫投詩以弔

周駿嶽姪宏源 廷相

駿嶽字望熊武進人廩生以經學稱性樸訥家貧嚴於取與覃精三禮自漢唐以來諸儒書皆究其奧突然不執己意務得聖人制作原本以積思致疾卒兄子宏源工詩駿嶽乃兼治詩嘗曰吾詩學宏源律身師廷相廷相者亦駿嶽猶子以篤行聞

張一是兄一備

一是字天隨更名蘭臯武進人兄一備滁州訓導課士有法檄委振饑杜侵漁災民頌德一是棄舉子業肆力經史尤嗜易彙治易家言數十百種細繹精奧晚得蔣理正讀易通鈔因延於家喟然曰經義當以彖傳爲斷著周易析疑歷五十餘年始脫稿邀一僞解官歸晨夕講學暇則品題書畫年七十

四卒

趙彪詔

彪詔字豹三申喬季子雍正七年詔舉有猷有爲有守之士學使者以彪詔應辭不獲以縣丞試用四川補遂寧縣丞入署縣事所至多惠政年六十謝歸喜撰述當簿書冗沓未嘗輟學及歸擁書自娛尤留意桑梓故實凡儒先事狀鄉邦氏族官府文移閭里謠諺可備稽考者罔不搜討錄爲巨編共百冊冊厚二寸許摺疊黏補纖悉不遺乾隆三十年分纂武進陽湖二縣志皆取徵焉

陳儀

儀字象采武進人工書能詩詞善畫山水蘭竹家貧以客遊養親歷齊楚燕豫渡潯陽幾溺死後歸里病劇囑其友高景山曰別子矣有一事累子平生詩稿已葬魚腹惟題畫一冊獨存幸爲刪訂以存老漁面目因檢授之曰彼題景我題情似不可沒也是夕卒

胡淦

淦字聖智武進人雍正七年舉人祖宗虞貴州廣順知府以抗直忤上官罷
值亂道梗僑寓於黔淦生六歲始歸里好讀書不問生產歷敘古來陵墓爲
闡幽錄搜採淵博又輯歷代謠諺爲一書曰空庭天籟

段之縉子汝舟 孫達和

之縉字改齋武進人雍正八年進士乾隆丙辰出爲廣西全州知州有政聲
量移柳州通判引疾歸後六十年而同邑劉成志亦爲全州知州蒞任時謁
城隍祠見像設爲今衣冠貌如生詢耆老曰此前任段公也公惠愛及民去
後若干年見夢於州人曰吾奉帝命爲此方城隍神矣旋見具儀從呵殿而
去未幾州有忤其父者忽號呼曰神怒拘我朴責矣趣詣祠叩首悔罪嗣是
屢著靈異於是州人肖之縉像祀之劉展拜而退旱潦祈必應每有疑獄輒
就祠旁設案鞫之令兩造蒲伏堂下若對簿於神者犯皆齎蘇自吐實得盡
讞劉敬禮之之縉任全州凡四年甫下車見廨側有銀鐙憔悴者五六人詢
知前任比追鹽價船戶也稽其數計五百餘金乃惻然爲代償而盡釋焉州
爲粵西門戶驛使如織舊例於各鄉按戶僉役吏胥藉擾甚病民乃革除之

官爲雇募遂爲令常平倉不戒於火之緡拜禱風立返得撲救止其他修津
梁建義學立保甲禁私宰爲民興利除弊者事不勝舉子汝舟乾隆十年進
士保德知州亦以循吏稱孫達和乾隆五十三年舉人舒城教諭克敦學行

錢枝起

枝起字方高武進人性明敏研求經史務在實用治三禮詩義皆極精邃以
歲貢薦在工部營繕司學習綜練掌故精勤能斷遇事可否輒侃侃爭之爲
同列所忌遂乞養歸卻掃著書迄終制不復出

莊廷璽

莊詠荒

莊寶煊

莊俊家

廷璽字桓覲陽湖人雍正十三年副貢性嗜學尤研三禮選含山縣教諭卒
其族爲昇東鄉著姓稱坂上莊氏多讀書循謹者咏箎字仲吹府學生少孤
事母至孝博學勵行教生徒多所成就熟桑梓故事寶煊字仔珊道光十七
年舉人俊家字苑珊恩貢生皆有文譽爲其鄉名師

屠遠

遠字帆輕武進人博學能詩尤工畫山水蘭竹

吳龍見

龍見字恂士一字惺士又字薛帷原名憫立武進人雍正十三年進士舉博學宏詞少遊日下嗜吟咏洎補博士弟子試承宣司出從海寓耆彥遊而所詣益進其詩膽而不排沉而不晦優柔而不齟裁束而不臞軒鶴寥天跋而竢之矣工賦淳質密諦朗析蘊藉在蕭謝之間

唐春

春字宥涵武進人孝本子孝本守撫州時撫屬武舉應斯鳴者橫於鄉孝本懲以法會以事忤巡撫斯鳴撫其他十餘事屬某吏上之巡撫遽列款入奏斯鳴潛入都主部屬盧某家爲中傷計春方應試順天偵知之祕不發覆審本下部議先期一日白寃於刑部尙書汪文端公由敦詰旦集西曹盧出所駁撫州事以陳文端曰爾何主應斯鳴於家盧語塞郎官皆色變宰相鄂文端公不欲興大獄斯鳴竄去事以白

朱典六

典六武進人擅鐫石其刻王樹書東昌鄧基哲墓表篆楷神髓不失

△徐煦

煦字道和別字春如號半菴居士武進人諸生工書法顏趙詩文數卷亂後盡失

△徐元璣

元璣字季真號醒菴武進人官河上同知善丹青凡花草禽鳥脫稿如生然不多繪片縑尺素人得之珍逾拱璧詩文集亂後所存者僅十二三

清代毗陵名人小傳稿卷四

邑後學張惟驥季易纂

劉 綸

綸字春涵號繩庵武進人乾隆元年以廩生召試博學宏詞第一授編修廷試五六天地之中合賦諸徵士不解所出瞠目縮手綸獨揮翰如飛桐城張文和公故睨綸卷對衆朗吟始共得題解時長洲沈歸愚宗伯亦以諸生赴召試未第頰首曰吾輩頭顱如許乃不如一後生得不愧死釋褐後以文章學術受知遇供奉內廷直軍機未三十年參預閣務天下皆望爲鉅人長德高宗習知綸忠信可倚又八年擢文淵閣大學士加太子太保秉節簡諒朝野翕服三十八年卒於位年六十三贈太子太傅入祀賢良祠詔皇子臨其喪賻金賜祭賜諡文定親製碑文恩禮罕比其爲人謙和柔謹以清修自厲少在尹文端公幕府得其指授繼以宏博入翰林汪文端公愛其才兼重其度晚年與劉文正公尤相得和而不流無所附麗時有南劉北劉之稱其爲

文取法六朝代言應制皆爲一時冠而詩獨喜青邱退朝手一冊兀坐服食儉素蕭然如布衣王昶嘗以要事繕奏稿夜半詣綸請閱綸起然燭操筆點定時仲冬寒甚命其子具酒脯而廚傳已空僅有白棗十餘枚以侑酒亦自歎其儉陋可哂也

楊煜曾 秦懋紳 吳 濬

煜曾字吾三武進人祖楫子乾隆薦舉博學宏詞未試丁憂六年順天鄉試舉人官內閣中書傲岸負奇氣博學淹通名公卿咸傾倒與煜曾同舉博學宏詞者秦懋紳字子宏武進人雍正四年華亭籍副貢五經准作舉人吳濬監生陽湖人

劉鳴鶴 子 欽

鳴鶴字皋聞武進人少孤才氣挺發於經傳無所不窺乾隆元年以廩生舉博學鴻詞十六年復舉經學經明行修子欽字敬輿乾隆十七年進士廣西陽朔縣知縣性恬退中歲歸以著述自娛

王光燮

光燮字藝山武進人九歲能文章十一應童試縣令奇其文拔前列十二應學政試日不移晷走筆成七藝補學生員乾隆元年以五經補順天試明年丁巳科成進士前後爲令三十餘年凡任粵閩各三直隸再歷江西者四三與同考所至縣去官後久之猶見思大指與民興利除害力之所能至務推行之以此得吏民心雞澤人列上光燮於名宦云

蔣麟昌

麟昌初名壽昌字靜存小字僧壽陽湖人乾隆四年進士官編脩文章典瞻尤工詩侍值圓明園恭和御製消夏十詠援筆立就稱上意賜與有加嘗曰文章之事吾畏袁子才而愛裘叔度他名宿如沈歸愚易與耳纂修三禮積勞成疾卒年二十二

程景伊

景伊字聘三號莘田武進人彥子乾隆四年進士改庶吉士散館授編修進易泰卦保泰箴上深嘉賞命書於御屏尋遷侍讀累官至東閣大學士卒諡文恭贍於詞章兼精吏牘初不以道學名而於濂洛五子之教素所服膺其

見於詩者冲和真淡不愧有德之言

龔錫純

錫純字侯服武進人乾隆六年解元潛心根柢之學尤精三禮發爲古文辭原本經術以磅礴鬱積之勢行之性耿介不妄干謁落落寡諧客京師與桐城方苞論古有契稱忘年交家貧賴修脯以給薦於行誼舉族之不能殯者十餘喪所居敝廬不蔽風雨怡然自足年六十餘卒

楊述曾

述曾字二思號企山陽湖人椿子乾隆七年殿試第二人及第官至待講卒贈侍講學士先是於乾隆元年舉博學宏詞長於史學詩宗杜韓蘇丁卯典試雲南著使車集佳處直逼東坡乾隆間朝廷命儒臣纂通鑑輯覽述曾任纂修官年經事緯提綱分目一依朱子綱目書法總裁官以分注紀年欲改綱目舊文稍變其例述曾裁書詳答其略曰考分注紀年雖於義例無關而全書體製前後不可不一今欲削去五季帝號廟諡其例當斷自周亡後之七國起蓋七國之稱王猶五季之稱帝五季旣削則秦不得稱莊襄王當書

秦君某楚不得稱考烈王當書楚君某他國皆然并於凡例標明下書曰後南北朝五季倣此前後體例方爲畫一此一也唐漢祚短閩蜀偏隅誠無可紀但史例建號不論短長列國無分大小審如所云則項羽之亡也忽焉將不得稱之爲霸王春秋之滕薛小國可不稱之以侯伯歟此又一也南北朝之於五季政猶魯衛然以五季例南朝及北朝之齊周則可若以例魏則恐未安魏起代北遂有中原非同篡奪且孝文令主聲名文物後世所稱分注將不帝而諡之乎此又一也宋太祖開基誼辟書法自當上媿唐高不得與五季並論但晉武隋文亦嘗一統或一傳而亂或再世而亡其禪代之初將稱帝乎抑或否乎此自當與唐宋同例其何以服子桓黑獺後世若有胡致堂諸公必起而肆其訾議矣此又一也卒從述曾言悉依綱目書法述曾之史學於此可見其大略在事入載編排盡力書垂成而歿所上經史摺發明傳注俱有師法因事敷陳人稱爲有用之學

湯大紳

大紳字孫書號藥岡陽湖人乾隆七年殿試第三人及第官編修十五年上

命大臣保舉堪任考官者大學士孫嘉淦特薦大紳人品端方學術醇粹兩充同考官得朱珪徐廷玉名以益重爲人傲岸磊落工詩詞

白仲徵

仲徵陽湖人諸生乾隆九年鄉試仲徵倍五經之數作四十六篇監臨某以格於成例不敢入告致貼出遂恚死

順治乙酉丙戌康熙戊辰等科以五經邀甲第者不少然皆監臨科道特疏奏請否則以違例貼出壬午以後有旨願作五經者聽

錢維城

子中鉦

維城初名辛來字宗磐號稼軒又號茶山武進人人麟子乾隆十年殿試第一人及第授修撰累官刑部侍郎卒贈尙書諡文敏修律例舉其援引歧誤者疏請更改下部議行之視學浙江以士子工揣摩少實學飭諸生以半年習一經於按試時覈驗士習一變工詩文善書畫書法蘇文忠其於畫天授也初從錢香樹尙書母夫人學畫花卉不甚作山水後一染翰遂成名手渾雅疎散滿紙烟雲擅元四家之勝卓然成大家與富陽董宗伯齊名皆以幽深兼沈厚勝而維城又秀骨天成蓋通籍後得力於東山者也次子中鉦字

守之官中書科中書畫承家法以筆力見長不多斂年三十餘歿其畫世不多見

莊存與

存與字方耕號養恬武進人柱子乾隆十年殿試第二人及第授編修屢遷至禮部右侍郎幼誦六經尤長於書傳山右閻氏之學既北成進士閻氏所廓清已信於海內江左束髮子弟皆知助閻氏言官學臣則議上言於朝重寫二十八篇於學官頒賜天下考官命題學僮諷書偽書毋得與將上矣存與以翰林學士直上書房爲師傅聞之忽然起遁然思鬱然歎愾然而寤謀方是時國家累葉富厚存與自顧以儒臣遭世極盛文名滿天下終不能有所補益時務以負麻隆之期自語曰辨古籍真僞爲術淺且近者也且天下學僮盡明之矣魁碩當弗復言古籍墜湮什之八頗藉僞書存者什之二帝胄天孫不能旁覽雜氏惟賴幼習五經之簡長以通於治天下大禹誤廢人心道心之旨殺不辜寧失不經之誠亡矣太甲廢儉德永圖之訓墜矣仲虺之誥廢謂人莫己若之誠亡矣說命廢股肱良臣啓沃之誼喪矣旅葵廢不

寶異物賤用物之戒亡矣罔命廢左右前後皆正人之美失矣今數言幸而存皆聖人之真言言尤疴癢關後世宜貶須臾之道以授肄業者存與乃計其委曲思自晦其學欲以借援古今之事勢退直上書房日著書曰尙書既見如千卷數數稱禹謨虺誥伊訓而晉代劉拾百一之罪功罪且互見存與是書頗爲承學者詬病而古文竟獲仍學官不廢有清經學盛於宋元明乾隆間毗陵人治之者易則張惠言書則孫星衍春秋則洪亮吉皆粲然成書著於一代其時存與以侍郎官於朝未嘗以經學自鳴道光八年存與孫綬甲刻所著易說若干卷行世然後人知存與深於周禮春秋天官歷律五行之學其爲文辯而精醇而肆恠遠而義近舉大而不遺小能言諸儒所不能言不知者以爲乾隆間經學之別流而知者以爲乾隆間經學之巨匯也

李英弟尊

英字御左一字蘋圃晚號蠡堂武進人乾隆十年進士內行純篤淵然而靜書法清勁得晉人遺意爲諸生時以書名大江南北求之者戶外屨常滿及入詞林譽益重詩清微淡遠自心坎流出

萼字秋岑一字原棟諸生英弟早負文譽刻苦好學鄉試十五薦不售由歲貢選授山陽縣訓導未赴任卒以能詩善書聞

盛綱

綱字口口武進人乾隆十年進士官山西絳州知州工文善書畫

楊肩吾

肩吾字大受武進人幼穎異弱冠入邑庠乾隆初學政夢麟以少年掌文衡試諸生經解肩吾背誦如流學政曰吾抵江南以來罕見博聞強記者今得之矣教授里門從學者甚衆

是鏡盛衡

鏡字仲明陽湖人布衣與友人孫子房講程朱之學不求聞達究心經籍篤志勵行江蘇學政尹會一親枉車騎過訪既歸卽草疏薦之大學士高斌河道總督顧琮於乾隆十六年先後保舉經學於是年同以經學保舉者又有劉鳴鶴盛衡二人鳴鶴已見前

胡時顯

時顯字行偕一字晴溪武進人以軍功官至鴻臚寺卿爲文移箋奏頃刻立成曲折如意同輩雖精思不能易一字尤善書

許璿耀

璿耀字在衡武進人年十三補縣學生從常熟錢陸遵遊陸遵極賞其詩入試不售遂絕意進取專以著述爲事年六十四卒

楊文言

文言字道聲武進人瑀子幼有神悟於學無所不窺尤通歷算長洲何焯用西法推尙書辰勿集房不合文言以大衍授時二曆推之皆合一時稱爲絕詣少遊閩中值耿藩亂起被羈事平得出聖祖夙知之嘗問於李文貞光地對曰杜門高蹈李顯之流

劉星煒

星煒字映榆號圃三武進人乾隆十三年進士累官工部侍郎以工詞章擅名屢典鄉會試號稱得士提唱風雅獎掖後進不遺餘力自奉儉素每春秋佳日同僚宴遊過其舍一燈熒熒然父子伏几讀書都下傳之

惲源景

源景字希述武進人乾隆十五年舉人冬官正轉工部主事畫法黃筌官京師垂五十年無車馬塵破屋敝幃不見厭苦之色

張洽

洽字月川又字玉川號青箬武進人山水蒼秀橫絕中歲游京師曾於藩邸縱觀珍秘名噪於時好作層巒疊嶂枯筆焦墨皴擦特異袁竹室馮墨香並推重之嘗曰細畫麓收拾畫細收拾軟紙用硬筆硬紙用軟筆此吾訣也晚契禪悅一寫性靈結廬於棲霞山以終嘉慶四年也年八十二

蔣和寧

子齊耀

和寧字用庵號耦漁武進人乾隆十七年進士官至御史二十四年朝廷修通鑑輯覽和寧及楊述會同充纂修官好汲引人才孜孜不倦二十七年主考貴州凡批落卷輒教以宜讀某書學某家文洽行時被放者追送數百里曰此吾經師恩勝座師也丁亥兩江制府高晉聘修南巡盛典工詩詞寓意深婉子齊耀工書

胡 憫

憫字慄侯武進人乾隆十八年舉人性狷介謹然諾著作甚富尤長於論史屢上春官不第歿於京邸遺書散佚

莊培因

培因字本淳武進人柱子以內閣中書考充軍機章京乾隆十九年殿試第一人及第官至侍講學士乾隆間毗陵人以鼎甲通籍者如楊述曾湯大紳錢維城莊存與趙翼劉躍雲孫星衍洪亮吉皆是也而培因與存與則又兄弟鼎甲可謂盛矣二十一年培因主考福建存與亦主考浙江路出毗陵俱省親而往人以爲榮平生尙氣誼重然諾詩文敏贍楷法精妙在樞廷時扈蹕出塞於行帳中錄章奏事有急宣或不據案常手一摺匣疾書而工整不異常時人以爲尤難

莊 斫

斫字虛庵一字景炎陽湖人副貢生官邠州知州年十五卽以詩文著聲其時邑士子專工制藝鮮究實學士風大壞斫開始講求古學劉文定謂當爲

毗陵人首屈一指熟精漢書詩古文辭入大家之室畢秋帆最器重之其居官有隱德鞫白蓮教案爭於統軍免株連者萬人去官之曰人民求畫像以祀之

楊濟恩 弟湛恩 洽志

濟恩湛恩洽志武進人俱楊瑤子濟恩能詩文湛恩字琴山善畫山水氣韻冲和泉壑深遠意在大癡黃鶴之間洽志工仕女時稱爲楊美人

湯脩業

脩業字狷庵號賓鷺陽湖人大紳子博學強記尤悉鄉邦故事譚終日不倦激濁揚清無所回屈有毗陵文獻之稱詩文峭勁簡直如見其人詩導源香山而不襲其貌文則長於記事論說以達意爲主而橫直自成體勢望而知爲有德之言

朱文嶸

文嶸字酉巖號峻三武進人乾隆十八年舉人官興化訓導博雅工文善書畫書法聖教序畫宗北苑大癡間寫水墨牡丹脫超名貴尤爲藝林所珍薩

厚庵總制兩江慕其名延主西席不就揚州太守某君屢求作畫輒婉謝之其高介如此

劉煥章

煥章字旭岑號霽軒武進人乾隆二十五年進士由浪穹知縣署蒙化廳被劾遣戍改徒留滇騰越州牧吳式齊楷招主來鳳書院卒於騰越相傳煥章少不羈翁檢制之不能得乃砌諸一室納以書外穴一牖通飲食平日往來者任其從牖與語翁於壁間伺之其相規者俟其出迎而饌之且囑其時至其匪僻者輒絕之數月聞室中讀書聲卽予好飲食繼且讀日夜不倦益予佳饌居二年出之則自課文已盈寸樂守一室不願出矣此蓋倣胡文定教致堂先生法也

趙翼

翼字耘松號甌北陽湖人乾隆二十六年殿試第三人及第二十五年庚辰科大魁爲畢沅次諸重光皆軍機中書也翼成進士亦內閣中書入直軍機處忌者因爲蜚語上聞比廷試劉文正文定兩公又以軍機大臣充讀卷官

翼慮其以嫌擯也乃易書法作歐陽率更體文定微疑之以語文正文正笑曰趙翼書吾能辨之此必非也進呈一甲第一王文端杰第三高宗謂陝西未有以第一人舉者遂以互易文正乃歎曰能者固不可測耶授編脩脩通鑑輯覽簡鎮安知府鎮安居廣西極邊民醇訟簡而倉穀出入吏緣爲奸乃痛革其弊民大悅服每出巡輒舁入其村謂我公至矣進酒食如家人父子所至皆如之初鎮民與安南民入雲南土富州爲奸事發捕獲百餘人而其魁農付奉顧逸去前守坐罷官已而付奉死安南獲其子并其尸驗之信總督李侍堯疑其爲前守地也斥之翼申辯李怒而劾之適官軍進勦緬甸詔翼赴滇贊畫軍事乃追劾疏還逮反鎮會侍堯調兩廣乃示意監司欲翼稍折節而移之守廣州自助翼不可遂以他屬而適奉特旨調廣州監司乃服翼之有守也在廣州獲盜百有八人按律皆當死翼詳讞辟三十八人餘遣戍辛卯擢貴西道坐他獄降秩遂乞養歸丁未臺灣林爽文作亂侍堯赴閩治軍事過常州邀翼偕往時兵將雲集謂不日且盪平翼請侍堯密調粵兵爲備旣而總兵郝壯猷敗遁游擊鄭嵩戰死賊勢大振而粵兵四千適至人

心始安已而籌海運增雇直給衣裝奏輒報可侍堯夙以綜核爲政翼濟以寬大事平翼力居多始翼贊畫滇軍傅文忠爲經略擬大軍由戛鳩江進征緬甸而命提督五福由普洱進翼曰戛鳩普洱按圖相距不過三寸實則四千里而遙兩軍聲息不相聞進退維谷此危道也去歲明將軍不返由不得猛密路消息耳文忠瞿然問計安出翼曰大兵欲渡戛鳩江則偏師宜由蠻暮老官屯夾江下造舟通往來庶兩軍可以互應從之其後渡戛鳩之兵遭瘴多病而阿文成所統江東岸一軍獨完遂具舟迎文忠於猛養渡江而歸又敗賊於蠻暮老官屯得歲事焉臺灣之役鎮臣柴大紀守城半年以易子析骸入告而督臣尙未渡臺上得鎮臣奏憐臺民死守而大兵不至飛諭鎮臣以兵護民內渡命督臣拆閱仍封發侍堯以示翼翼曰某目昏願於帳外就明視之遂失所在閱二時始至侍堯怒翼曰明公尙欲封發耶柴總兵久內欲內渡畏國法故不敢一棄城則鹿耳門爲賊有全臺休矣且以快艇追敗兵澎湖其可守乎大兵至無路可入則東南從此不可問宜封還此旨某已代繕摺矣侍堯悟從之翌午接追還前旨之諭及批摺回侍堯膺殊賞而

大將軍遂得由鹿耳門進兵破賊皆翼策也臺灣既定侍堯欲奏起翼固辭因遊武夷徧歷浙東山水一發之於詩翼固善詩自少與諸名流相唱酬歸田後主安定書院日與故舊賦詩爲笑樂其詩與袁枚蔣士銓稱三家江督費淳漕督蔣兆奎皆門下士也每過存問翼咨詢風土言不及私兩公益欽重之嘉慶庚午重赴鹿鳴筵宴得旨賞三品服家居數十年及髦猶手不釋卷也

張蟾賓

蟾賓字步青號雲塢武進人廩膳生八歲失怙母白太孺人督課嚴以長以教迄於有成抗心希古爲文操筆立就蟾賓賦性沉摯恬澹寡欲尤不喜談人過與人交無城府久而能敬望之溫溫卽之愈愛有長者稱家貧羞潔白之養能得母歡心兄弟三人友愛無間與兄思楷並稱名諸生云

毛穎士

穎士字今吾武進人諸生天姿穎異與同邑沈濬趙翼有三才子之目屢試不售從蔣汾功學古文辭一時銘誄多出其手篤內行事叔母及姑咸中禮

讀書外無他嗜好教人量其才造就之各當其意門下士幾至百人嘗曰內重則外輕膏粱文繡非吾所羨吾自有真樂耳

畢

涵

子用霖

涵字有涵號焦麓自號萊竹居士又號止庵道人陽湖人善畫山水掃去塵俗遠宗古法晚年尤極清曠之致與錢魯斯稱書畫雙絕目爲毗陵兩家性古拙嘗至京師館禮親王邸賓禮有加而涵布衣芒屨舉止疏略一如在山澤間若相忘也已而歷游西南探峨嵋黃山諸名勝歸杜門不出錢竹初解組歸交接止素心數人與涵尤密乾嘉時諸畫家往往規矩失之拘滯縱放失之杜撰皆由不知古法涵稟資既高工力亦勝洵可壓倒時流蓋涵山水本由南田出而運以己意稍加放縱故無一筆似南田不似之似乃真似也善學古人者可以知所法矣長子用霖次子簡俱工山水簡自有傳

崔龍見

龍見字曼亭又字翹英號蓮坪自號萬迴居士陽湖人山西永濟籍乾隆二十六年進士仕至湖北荆宜施道有俊才好吟咏工詩詞得太白少陵溫李

風格其所作遺佚無存僅鳴秋合贛內有古近體詩十餘首詞一首又其妻錢孟鈿浣青詩草附詞一首而已龍見弱冠登上第志在致身清祕故自改官縣令後頗自悒快蓋不樂以簿書顯而所至屢有政聲

楊超子垣

超字楚善號逸齋武進人少孤善屬文祖母錢文敏公維城姊也於諸孫中絕愛憐之柝田若干畝爲膏火資所藏書皆畀之由是益勵志不少懈與同郡錢伯垌齊名文敏常於廣坐中指之曰我之自出固是不凡以苦吟致疾卒年三十七子垣字星伯少孤力學文名籍甚兼擅書畫生平和易與人交無城府多隱德事

陳明善

明善字服旃號野航武進人勤學問耽吟詠工書翰具經濟才游京師名動公卿錫山嵇文恭公諸城劉文正公咸深器識與嘉興錢載鎮洋畢沅輩日爲文酒之會旣筮仕山右間關雁門值天子臨幸備扈從行宮位置悉當上心蒙賜綵緞歷任代朔吉三州時經八載以母不能迎養乃乞歸詩在韋蘇

州王右丞之間書法直參魯公海岳之座求書者屢滿戶外人各滿意而去又工畫竹石家有亦園擅林亭之勝一時名士如趙翼洪亮吉等悉與交游賓客之盛甲於州郡長洲沈文愨公錢塘陳兆崙袁枚元和陳初哲登臨投轄累月兼旬賓主盡東南之美矣念後生讀坊刊書多訛音錯義乃詳校四書精刊之名曰亦園四書通行天下沾溉士林至今猶人能道之世稱亦園先生嘉慶八年卒年六十八

伍宇昭

子魯興

宇昭字青望陽湖人以詩稱里中喜交游而不屑矜聲譽嘗以爲古人之詩作者盡而詩盡後世不然作者盡而詩衰持論與時左而終不能奪其詩擅風調多纏綿宛篤之思每構一篇拈一韻必取諸靈府攬結窈冥不以蹈襲剽竊爲工信乎獨得詩人之性情者子魯興字康伯詩得家學優柔愉夷無悲惋憤激不自聊之態非獨有合於風人之旨蓋其胸中實有過人者

伍宇澄

宇澄字旣庭陽湖人五歲始能言不苟訾笑常屏坐一隅不與羣兒嬉戲就

學時其兄授以句讀輒茫然納諸闔闔間十餘年一日袖小詩出示其兄清婉可喜謂之曰馬後桃花馬前雪試下一轉語卽應曰春光不度玉門關始奇之時門戶中落宇澄一身任之摒擋諸務日昃始就食手一編坐數數投箸起每丙夜一燈熒熒然左手執書右手引杯吟諷良久更鼓旣沈酒溫數四而猶未卒飲也乾隆乙巳冬病亟枕上力疾作書致其兄曰吾年四十一而中道淪喪命也有詩若干篇不知當用覆醬甌否又善鑒賞法書名畫能辨真僞愛臨池與劉勁齋遊亦復點染蟲魚

錢伯垆

伯垆字魯斯又字魯思號野余一號僕射山樵又號見南居士陽湖人監生以善書名天下稱曰魯斯先生初至京師四庫書館方開天下寒畯奔走求試騰錄期滿得以丞簿進身其族叔父文敏公欲爲之地一試不入格伯垆亦去不屑也書初學董文敏後學顏魯公旁及徐季海李北海沈浸數十年復歸之宋四家蔡蘇黃米其爲書若風雨驟至颯然有聲縱橫馳騫頃刻數十紙放筆豪飲一坐盡暢嘗曰吾於古人書見拓於石者如見其未刻時見

其書也如見其未書時其精如此朋舊親故貧而求飲者輒書與之唯所欲其不合者雖強之不顧好學工詩文文授法於劉海峰詩學少陵兼學誠齋石湖特爲書所掩耳內行篤脩多識前言往行事母夫人至孝年逾六十若嬰兒子然娶妻不育或勸置妾曰弟有子卽吾子也何妾爲及弟死其子亦皆死不得已置妾焉連舉三子山簡小晉又男

錢維喬

維喬字樹參一字季木號曙川一號竹初又號半竺道人小字阿逾維城弟乾隆二十七年舉人官鄞縣知縣有政聲爲文博瞻詩則五言法魏晉六朝歌行自唐初以迄北宋諸家無不涉歷近體尤近大歷十子雖心摩古人而別有一種幽奇靈秀之氣耐人尋味工山水不專一格茂密峭秀兼擅其勝筆意鬆靈氣體清逸一種蕭疏恬雅之致脫盡畫家面目無一毫烟火氣擾其筆端在鄞時嘗自繪竹初庵圖徵詩圖中題詩十數家鄉先哲爲多最後一人甌北趙先生也歸田後得唐雲客舊園之半葺而居之名之曰半園之半藝花種竹享幽棲之樂垂三十年與畢焦麓最相得書畫詩文皆與其兄

媿美晚通禪理自號淨繼老人嘗撰自述文歷敘生平以莊楷書之又撰半園之半記屬錢魯思書之又屬梁谿華吉厓繪小像曰秋空倚杖圖以三者合裝一卷題曰三幻同時鄉賢題詠者數十家末一人則味辛趙先生也

董潮

潮字曉滄號東亭陽湖人乾隆二十八年進士授庶吉士少孤育於外家陳氏母撫之成立贅於海鹽遂占籍焉讀書負志節爲詩激昂感慨獨寫性真言必稱情藻必當物凡辛苦愉樂之詞一視乎其境之所遭而不矯飾也與諸名士結社聯吟有嘉禾八子之目詞尤綺麗作紅豆歌人爭傳誦兼善書畫工駢體文乾隆間上允廷臣請以禮闈備卷四十人備中書學正之選潮與焉尋入內閣行走充通鑑輯覽纂修官旋成進士甲申請假歸葬其先人應修兩邑志書之聘垂成而卒

湯大奎

子荀業

大奎字曾輅號緯堂武進人乾隆二十八年進士官鳳山知縣母董太夫人夢都穆儒冠負笈入門而生少工詩五十一年冬臺灣民林爽文作亂募鄉

勇守禦賊黨許光來等陷鳳山大奎與子荀業同日被害奉旨准建忠孝專祠

湯伊勳 孫隆誼 曾孫述高

伊勳字孝思武進人業醫精婦科嘗冬日出見羣孩裸戲橋上語曰明日過神仙伊勳怪問之孩云仙在元妙觀前詰朝遄往無所遇至日中有癘丐四五席地酣飲氣穢不可邇指顧間丐忽杳遺荷葉一柄於地似方出水者攜歸植之瓶時疫甚盛需荷葉作引每診一人摘少許與之無勿瘳荷缺如鋸齒翌晨視之復圓如故人競傳其家有靈藥云孫隆誼擅家學每以數味起危疾遇貧病贈藥餌不吝曾孫述高事親孝能讀書克承先業

呂嶽自 弟岳尊 榮慶

嶽自字雲莊號怡白陽湖人貢生候選訓導幼敏慧讀書倍常人屢困秋試貧無以養常爲諸侯賓客詩宗王士禛然不以自重同時黃景仁洪亮吉諸人方以能詩噪邑里而未嘗與之爭鳴詩成輒隨手放散閒存草藁零亂篋中其弟子李兆洛聚而錄之不及百首蓋散佚者不可復收拾矣弟岳尊字

遜峰榮慶字月川俱有文名

吳一諤

一諤字二安亦字毅菴陽湖人諸生工篆刻古雅有法度人爭重之遂鬻其技以食每過朋舊之家或留之輒作數月宿日不過刻一兩石暇則曼聲而吟其爲詩力求澹澁一詩或苦吟至四五日脫稿不當意輒復棄去故其爲詩甚勤而存者甚少劉嗣綰謂其詩大似吳野人

錢履坦

履坦字像啓號素園陽湖人魯斯從弟長身鶴立伉爽磊落與張皋文董定園友善淬勵於學小試不利輒棄去工畫山水得法於其從父茶山竹初後乃專意寫生畫梅尤工直追元章詩尙性靈清氣橫逸如其人也

程景傳

景傳字命三號霖巖武進人貢生景伊弟安徽宣城縣訓導在都門時與周寄霄莊少彭結消寒會更唱迭和極一時之盛

龔顯祖

顯祖字孝由武進人貢生天資高邁少壯意甚豪飲酒無量晚歲屏跡村居習靜自得趙懷玉嘗從受學以母病遂通醫於天官地理家言多所涉歷尤工書

承 任張 序

任字是常號拙齋武進人諸生學於宜興杭樂通五經四子書泛覽百家爲詩古文以躬行爲務以所學授徒終其身作愛吾廬記以自述其辭曰愛吾廬者拙齋先生讀書處也破屋數椽不蔽風雨方庭踣武無佳葩奇卉可以娛目有書數千卷先生晝夜講習其中有四子一孫各授一經日與辨析疑義使爲歌詩文辭點筆以爲樂役使無童僕客有至者則延入蔬食相對與之論古聖賢若晤之几席也先生以致知格物爲基趾以身體力行爲堂奧以懲忿窒慾爲垣牆以推己及人爲門戶以書策吟詠爲園囿保吾天全吾真處而安焉入而自得焉蓋不足爲外人道也其指趣如此常語學者曰文詞小技于身心何益讀聖賢書如此爾耶吾平生服一言曰恕及老乃知恕以接物猶未可當思孟子三自反然則其得力之淺深與其勤於學至老不

倦皆可以知之矣所授徒陽湖張淳以力行稱於鄉里

李瑞岡

瑞岡字義一武進人乾隆二十五年進士少負文譽刻意勵行銘其齋曰二治軒謂治己治人義不偏廢也和易近人亦莫敢干以非義與趙翼管幹貞輩相酬唱風韻清遠爲後學矜式

吳星萃

父桂枝

星萃字東聯陽湖人世居馬跡山父桂枝以名進士爲經師弟子數百人修撰金榜大學士董文恭誥其尤著者也星萃早稟庭訓未弱冠卽補學官弟子陸廣霖頗稱譽其所爲制舉文已而依董文恭於京師肄業國子監凡客京師三十年旣屢試不售欲南歸輒因循不果未三十卽喪婦無子亦不更娶有友人姚某者官曹縣令請於董偕星萃而東嘉慶十八年林青之黨將爲亂金鄉令吳堦捕得崔士俊卽檄各縣緝賊至曹姚不之信景萃力陳利害並爲設鉤致方略甚具姚意稍動而吏役多賊黨奔告其魁知事泄遂先期攻縣署入之急求得景萃叱曰勸令捕我輩者汝耶景萃曰然恨不早聽

吾言使汝曹猖獗至此吾年七十有二豈畏死邪賊益憤攢刺之被十數創姚亦一家遇害賊去有營兵數輩至星萃臥積屍中見之呼曰吾已無生理幸加刃令我卽死兵憐之爲斷氣管乃絕時九月初十也吳堦旣得崔士俊旋誅其黨桀黠者數十人金鄉獲全巡撫上其功並陳姚死難狀以星萃名附得旨入祀忠義祠

鄭甫

甫字仲山武進人少孤力學弱冠爲文章多未經人道語家貧餬口大江南北見古人法書名畫好臨摹皆絕肖又兼倣秦漢篆刻以自娛

胡文英

文英字繩崖武進人乾隆卅年廣東籍副貢高陽知縣覃精著述尤粹於詩高寶仁

寶仁字惺存武進人乾隆三十年舉人泰興縣教諭訓士勤懇著述多散佚

楊麟

麟字戩音武進人考訂玉臺新詠

清代毗陵名人小傳稿卷五

邑後學張惟驥季易纂

劉躍雲

躍雲字服先號青垣武進人綸子乾隆三十一年殿試第三人及第累官禮部左侍郎父子相繼服官七十年家無一畝之宮半頃之田其家法可見督學江西公正自持不與地方一事典山東鄉試人呼爲戒尺榜以所得士多寒畯又多老諸生也詩宗白居易蘇軾文好歸有光書不名一家而有天趣

管幹貞

幹貞初名翰字陽復號松崖武進人乾隆三十一年進士累官漕運總督在官七年以節著弊絕風清宛如寒素其遇事彈劾雖要人無所顧忌工詩文善畫花鳥得南田真髓尤精設色牡丹

奚寅

寅字鶴溪自號芙蓉湖漁陽湖人乾隆三十一年進士負異稟讀書過目成

誦材武絕人能徒手搏健士數十輩成進士授湖南鄆縣知縣時緬匪滋事奉檄赴雲南軍前辦差脩道路催軍裝督糧運差竣還補衡山縣知縣緣事鑄秩特旨復官調湖北利川縣知縣卒於任寅志趣卓犖詩筆蒼健與會所至操翰若飛卒時散佚僅有存者

周景益

趙學申 沈霖

景益字星頡號宿航武進人乾隆三十六年進士官貴州黎平府同知苗亂守禦有功工詩文乾隆間毗陵人以制藝名者有神仙鬼怪之目管世銘爲神景益爲仙趙學申爲鬼沈霖爲怪皆經經緯史根柢深厚而景益與世銘不獨精制藝詩亦卓然可傳也學申字法五乾隆五十九年舉人霖字佩蘭乾隆四十二年舉人豐潤知縣

唐爲坤

弟爲垣

爲坤字虎臣武進人乾隆三十六年舉人赴禮部試有授關節者爲坤謝曰始進不正何以爲臣少孤家貧資授徒以養母除夕貸錢置懷墜地或拾之爲坤熟視笑曰若貧於我趣持去家故有僮數十人遣各治生歲時猶修禮

階下爲坤焚其券遣去之氣節嚴重文章清勁晚更和粹卒年七十九弟爲垣字麟臣諸生學於爲坤與兄友愛或爲嬰兒嬉以娛母鄉里爲化無悍弟子

莊通敏

通敏字澹迂又字迂甫亦字霽辰武進人存與子乾隆三十七年進士官至左中允工詞

徐大榕

大榕字向之號惕庵武進人大興籍乾隆三十七年進士授戶部主事官至山東濟南府知府緣事鐫級尋改京秩歸養卒年五十七嘉慶八年也官萊州府時平度州民張子布者取於羅婦弟有良與子布素不睦子布外出有良鬻其姊子布歸索婦有良斃之并自斃其母以滅口有頃子布蘇有良遂以母死誣子布知州以狀上大榕閱原驗腹下傷指方曰吾訊子布跣足鬪而有良納鐵裹鞋乃有良蹴也遂出子布坐有良大逆大榕素戇直官部曹時大吏亦京秩有隙故庇州官劾大榕故出入先削職大榕星夜赴州私訪

得有良錫死狀州士子及張羅左右鄰保案無枉具切結不三日委員摘印置大榕濟南獄候勘大榕獄中書狀遣所親至京師控察院天子命尙書胡季堂按其事引囚入方嚴冬震雷發於庭聲訇訇數日不止有良盡吐蹴毋狀事乃白卽日復官旣出觀者數萬人遽呼曰徐青天擁之去大榕治事外不爲雜戲具則棋不棋則作書不作書則爲詩詩至數千首方在濟南獄時官吏欲置之死鉗欽之外繫大鐵索苦之方暑環以糞穢大榕吟嘯自如得詩數十首真健才也書學虞褚自以爲二代絕手

莊勇成

勇成字勉餘武進人性孝友接物尤寬厚好學不厭旁及詩古文辭精贍爲同輩所推服十試不售乾隆三十七年高宗南巡召試欽取二等以諸生終

黃景仁

景仁字漢鏞一字仲則又字仲澤別字西蠡自號鹿菲子小字高生武進人乾隆四十一年召試二等例得主簿入貲爲丞天才亮特少偕同里洪亮吉效漢魏樂府體逾月而大工風神玉立世比叔寶所撰小賦新詩已有名於

時常熟邵齊燾主常州書院從之游學大進既而彈鋏依人歷游楚越長安等處又先後從大興朱筠青浦王昶游務爲閱覽博聞之學所過名山探奇歷險才力皆足以發之激昂排擗不主故常自恨其詩無幽并氣蓄意欲游京師平生於功名不甚置念議敘得官後未及選復游秦晉行次解州而卒年三十五亮吉往爲經紀其喪伴其柩數千里而歸景仁天分絕倫幼有神童之目朱筠以天才稱之良非虛譽其詩自漢魏六朝下逮唐宋咸能采擷精英自成杼袖而七古神奇變化獨近青蓮乾隆六十年間海內詩人能從古人出而不爲古人所囿者論詩者推爲第一詩詞外兼工翰墨書法在東坡山谷間分隸古雅有致又工畫善篆刻

案先生篆刻有西蠹印存一卷久佚近見吾鄉王氏藏先生手書梁可堂竹譜序墨蹟一幀鈐章凡五除名號兩章外有山谷之子孫朱文圓印有金華牧羊兒朱文長方印有西蠹病漁白文長方印皆刀法高雅神采照人可窺見先生印藝一斑附記於此

惲源濬 惲 惲宅仁 惲與三 惲 惲 惲 惲 惲源成 惲廣颺

源濬字哲長武進人善吹鐵簫號鐵簫老人天津縣丞畫法一準徐熙下筆

有芒角生氣全涌如雲展潮行惜稍俗耳爲人爽邁言出必踐去官後卒於天津翊字相白畫學南田宅仁字原長畫多贗南田然質重韻味無絕勝者與三字德三乾隆三十九年舉人歙縣教諭能山水花卉筆法清婉兄弟皆困乏爲教諭不能贍其家棄去鬻畫京師客雄縣以卒標字樞亭花卉魚蟲不失毗陵正派筆極秀麗奎善花卉源成花鳥宗家法廣颺工花鳥

李汝礪

汝礪字貢三號漱石武進人乾隆四十二年拔貢幼負奇氣長而蘊蓄經濟能文章非獨長於詩也弱冠貢於朝人爭求其詩鴻篇鉅製倚馬可待不幸早世遂散失

管世銘

世銘字緘若一字韞山小字興隆武進人乾隆四十三年進士以主事用分戶部行走旋補山東司充軍機章京擢雲南司員外郎山東司郎中六十年改浙江道監察御史奏留軍機處嘉慶三年轉廣西道故事部郎充軍機章京者改官御史卽罷直或軍機大臣奏留其儀注仍如司官不得專達封事

世銘少讀史慕汲黯朱雲之爲人及成進士金壇于文襄公實爲總裁文襄好士所援引或數年至卿貳世銘旅進旅退未嘗獨求見以所能自異文襄卒和珅浸用事世銘益憂憤每與同官論前代輔臣賢否語譏切無所避和珅微有聞而章佳阿文成公方倚如左右手猝未有以中傷旣擢御史則大喜夜起傍徨中庭搆疏稿未成而仍留軍機命下阿文成請也世銘廢然入謁文成自言媿負此官文成知世銘意慰之曰報稱行有日耳何必汲汲以言自見耶蓋文成期世銘大用不欲以擊奸獲譴其用意至深世銘亦感悟稍自韜晦而諷諭之意一以寓之於詩今所傳韞山堂集是也世銘所居曰韞山門下士因稱韞山先生故韞山之字特著後四年和珅誅朝廷行大賞薄海臣民歡呼相告語而世銘前歿不及見矣卒於嘉慶三年年六十一

許亦魯

亦魯字效曾號省輿陽湖人乾隆四十四年舉人姿稟穎異爲文跌宕不羈鄉舉出翁方綱門名動公卿間五試禮部不售將大挑權貴欲爲之地輒不屑惟以著述自娛

丁履端

履端字郁茲武進人乾隆四十四年舉人官直隸威縣知縣永定河漫溢壞田廬履端亟堵築請賑全活甚衆工駢體文尤長於詩

陳昶

昶字春噓陽湖人乾隆四十四年中式順天鄉試舉人出爲浙江知縣歷署桐鄉秀水餘姚諸縣皆有政績學問淹博不特明於政事凡古文詩賦詞章及書畫藝術無不通曉而尤邃於地理及兵家言真經濟才也後補奉天錦縣縣中習武不讀書昶爲立書院涵濡教育不二三年中式者數人嘉慶十一年仁宗巡幸關東獻賦者十六人文教從此大興任錦縣七八年圖治益精士民感德爲立生祠卒於官年未五十

沈箱傳

箱傳字青業武進人世居焦塾諸生砥行勤學不偶於世少負文譽秋試累薦不售巡撫汪稼門爲監臨見其文激賞之欲引之自近不就所爲文日益精詣詩則直道胸膈不屑屑摹唐範宋特自以真率寫懷抱耳

袁廷吉

廷吉字次修號春江武進人諸生文名藉甚然數奇屢薦不售淡然處之終年矻矻殫精經史善獎借後進曰遇不遇命也安之可矣

莊述祖

子又朔

述祖字葆琛陽湖人培因子乾隆四十五年進士歸班銓選得山東昌樂縣調濰縣明暢吏治刑獄得中豪猾斂跡嘗勸謙地衆以爲斥鹵也述祖指路旁草問何名曰馬箒乃笑曰此於經名莽夏小正莽秀記時凡沙土草莽者宜禾何謂謙衆皆服以卓異授曹州府桃源同知不一月呈請終養歸著書色養世父方耕先生博通六藝高朗闊達於聖人微言奧義能探索而擴言之述祖淵源旣邃益研求精密於世儒所忽不經意者踏間覃思獨闢天地以爲連山亡而尙存夏小正歸藏亡而尙有倉頡古文略可稽求義類故著夏小正經傳考釋以斗柄南門織女記天行之不變以參中火中紀日度之差以二月丁卯知夏時正月甲寅啓蟄爲歷元歲祭爲郊萬用入學爲禘博覽載籍精思而貫串之著古文甲乙篇謂許叔重始一終亥偏旁條例所由

出日辰干支黃帝世大撓所作沮誦倉頡名之以易結繩伏羲畫八卦作十言之教之後以此三十二類爲正名百物之本故歸藏爲黃帝易就許氏偏旁條例以幹支別爲序次凡許書所存及見於金石文字者分別部居各就條理皆義理宏達洞見本源爲前賢所未有五經悉有撰著旁及逸周書尙書大傳史記白虎通義其於舛句訛字佚文脫簡易次換第艸薤腋補咸有證據無不疏通曠然思慮之表若面稽古人而整比之也子又朔字穉莫幼承庭訓學有家法工篆籀楷書

莫自珍撰武進莊公神道碑銘述祖爲存與子附記於此

趙懷玉

懷玉字億孫號味辛又號映川別號琬亭晚號收庵居士武進人侗數孫乾隆四十五年召試舉人授內閣中書選山東青州府同知署登州兗州二府丁父憂歸遂不復出年十二能詩以世家子少負重名交滿天下求文者自遠而至有清一代爲古文者以十數其尤者寧都魏禧才博而識贍有物之言也桐城方苞學醇而詞雅有敍之言也殆未可以相優劣焉懷玉以魏氏

之才與識而爲方氏之學其文浩浩以遠醞醞以深意欲兼方魏而有之晚年病廢家居里中人日集其庭商榷議論性坦易無城府自言不敢好名爲欺人之事不敢好奇爲欺人之學其學於校勘爲尤精

呂光復

光復字雨純號石農陽湖人乾隆四十五年召試舉人善寫山水名不甚著而筆墨有過人者

楊倫

倫字敦五一字西禾又字西河號羅峰陽湖人乾隆四十六年進士歸班候選官廣西荔浦知縣荔浦獠獠雜處民多樸陋乃創正誼書院招邑之秀者課其中捐俸獎其前列士風丕變暇則手一編自娛太史章奏以出倫手爲重值計典巡撫已列倫卓異未及引對而沒博極羣書早傳聲譽與同里孫星衍洪亮吉徐書受等倡酬爲詩最講格律以唐人爲宗人欲廣之倫以爲不可毗陵七子並才情橫逸議論風發倫獨精純嘗讀杜詩病箋釋之駁雜乃詳爲考究成杜詩鏡銓一書最爲精核世共推之嘗主湖北江漢書院江

西白鹿洞講席在廣西三爲同考試官所拔皆知名士

案先生不以書名顧近見吾鄉王氏所藏篆書楹帖法乳斯冰精整不亞孫洪兩先生用知賢者固無所不能也附記於此

盛惇崇

惇崇字柳五號孟巖陽湖人綱子乾隆四十六年進士官至甘肅布政使在軍機章京二十年勤敏稱職五署按察使遇疑獄多所平反畫似其父每進御輒蒙嘉賞與弟惇大齊名極一時風雅之盛

盛惇大

惇大字甫山陽湖人綱子乾隆四十五年舉人官至慶陽府知府以清省爲治士民便之在京師聚書二萬卷李兆洛爲作南墅書目序其嗜古如此工詩書學董思翁畫學黃子久聲重藝林乾筆焦墨蒼厚高古又極似王麓臺

孫念劬

念劬字潔齋武進人諸生約於遇豐於學所詣尤淳而邃故其詩磅礴鬱積悉本性情所流露皆稱心之言也哀怨中有真性存焉性情能得其真故有

合於昔人之言詩不可強作不可徒作不可苟作之旨也

劉岱松

岱松字五峯號勁齋武進人工寫墨梅及花卉草蟲瀟灑挺特不爲軟媚喜飲醉後乃揮翰畫畢隨手題其上往往有天趣亦工詩

惲敬

敬字子居號簡堂陽湖人乾隆四十八年舉人五十二年充咸安宮官學教習時同邑莊述祖莊有可張惠言海鹽陳石麟桐城王灼集京師與之爲友商榷經義古文而尤愛重者張惠言也五十五年教習期滿以知縣用前後任浙江富陽山東平陰江西新喻瑞金等縣知縣十八年所至輒忤上官上官之賢者亦輒保護之使忌者不得逞自以勤廉明決無可乘也可乘亦不以一官得失介意故屢瀕於厄益侃侃無所瞻徇最後署吳城同知爲姦民誣告家人得贓以失察黜官乃益務爲文自壯屬有門下士官安慶知府往謀之道遇疾歸歸寢十日而卒年六十一敬少好爲齊梁駢儷之作稍長棄去治古文四十後益研精經訓深求史傳興衰治亂得失之故旁覽縱橫名

法兵農陰陽家言較其醇駁而折衷於儒術將以博其識而昌其辭以期至於可用而無弊蓋於桐城諸賢方苞劉大魁姚鼐非徒不媿之而已同州之治古文者張惠言秦瀛趙懷玉吳德旋吳育董士錫顧翊亦推敬無異辭也

惲 敷

敷字子寬號遜堂陽湖人敬弟乾隆五十九年舉人仕至海寧州知州大挑一等嘉慶二十三年至浙江負才識精力絕人勇於從政常曰吾兄兼賁三才吾但欲旁通人事耳始至權歸安縣事五十日民歌頌之二十四年權臨安踰月將去時苦旱民請勘災得報而後行是年權定海定海孤懸海外控扼外洋額設兵二千餘名爲浙東巖邑惡少竄名軍籍中輒較轆人數至莫敢犯乃設冊以清田畝勸分粟以救饑饉民大悅服及受代皆泣下曰仁侯去矣爲立生祠道光二年以次當補宣平未至任三年秋嘉湖兩郡水災嘉善地尤卑下田廬漂盪老弱轉徙巡撫帥承瀛曰非惲君孰能勞來安定之乃調補嘉善敷日棹小舟撫綏沾卹民歸之如慈父母及冬請緩徵漕大府曰湖州烏程歸安被災重猶皆徵漕嘉善曷以緩敷曰湖州重蠶桑蠶旣登

卽被水害民猶有餘蓄嘉善以陶埴爲業野水遍地無以爲生富者又以捐振竭其財災雖輕於湖州民困實重於湖州也堅持其議莫能奪是冬嘉善不徵漕大府奏請治河相度地形博采輿論疏濬隄防皆有程則敍定海獲盜功五年擢海寧知州敷至海寧謁廟學仰瞻榱桷愀乎動容乃率僚佐董勸人士各出私錢不數月集金逾萬而明年敷以憂去州人士感念奮興力作罔懈越二年廟學成迺刊碑著勳用揚雅化勒石於奎星閣奎星閣者亦敷所創建州人卽以奉敷爲生祠春秋祀之又明年三月二十五日卒於家

吳堂

堂字公珍一字伯升號肯哉武進人龍見孫乾隆五十一年順天鄉試舉人乙卯大挑一等以知縣分發福建後以父母年老不能迎養呈部請改近奉旨發河南用其在福建先後權長泰同安龍溪三縣治長泰之械鬪結同安龍溪兩縣積案至四千件皆深得民心後以長泰任內米耗未完降調三縣民赴巡撫署乞留大府以違例難許遂留省審理命盜積案千餘件多所平反其在河南先後權魯山新野南陽每去官耆老遮道攀轅有泣下者大府

以堂勤於政治題授鄆陵縣知縣凡所設施士民德之平居未嘗臧否人物居官未嘗一日廢書間卽著述年逾強仕始懸肘作壁窠書寓省乏資至鬻字以給求者全集自以不早學書爲恨嘉慶十七年壬申卒年五十八

吳 堦

堦字次升號古茨武進人乾隆四十九年召試二等以知縣分發山東山東八卦教匪蔓延直隸河南境嘉慶十八年三省匪徒約同時謀逆堦首發其謀署金鄉縣之任卽下令禁不得以教匪相告訐於是賊潛歸遂獲賊魁崔士俊繼獲宋大勇孫戰標等一百六十餘人時定陶曹縣直隸長垣河南滑縣並殺官劫獄金鄉賊先受創圍城又不克論功爲最事聞擢桃源同知賜花翎未抵任擢曹州知府卒於任工詩詞

錢青選

青選字瑾巖武進人監生最工長短句詩亦倜儻風華殊可人意乃窮途抑鬱瘴死賓陽

鄭 環

環字清如一字夢暘自號東里居士武進人乾隆五十一年舉人大挑二等留京師恭與千叟宴選授甘泉縣訓導少喜兵家言後出入於縱橫家法家最喜道家雌雄白黑之說推陰陽進退人事盈歉其緒餘爲步引芝菌神鬼誕欺怪迂之術皆好之爲文章峭簡精強必己出讀書條解支劈鑿虛躡空已又以爲未盡反之張子邵子之說蓋環之學凡五變而精力亦涸涸不足以赴所志矣然好古求是克治強勉爲之於天下不爲之日有篤老不變者在京時湖北教匪初起環以爲嘉勇貝子方以勦逆苗駐湖南苗自守賊不足慮宜急徹兵至湖北期一月掃除勿使蔓溢昏暮走大學士英勇文成公及大學士忠襄伯之門欲白事門者拒之最後至大學士諸城劉文清之門得入文清謝不敏遂怒而出而城門已闔不得已宿於護軍校之邏舍其拳拳於世又如此嗚呼可以見其志矣

方聯聚

聯聚字友槎號樹星武進人大興籍乾隆五十一年舉人分發甘肅署禮縣知縣時以川楚賊方熾蹂躪秦鳳間禮縣當其衝賊首張漢朝王三槐等時

至城下肆攻擊聯聚葺城堞勵兵民與共守九月乃靖補成縣調平番均有惠政平反冤獄人以包孝肅比之

包士曾

士曾字省三武進人諸生世居橫山有聲庠序間七試報罷遂絕意進取專力詩古文辭論詩曰詩爲心聲吾之詩必有吾之心然後可若求肖古人雖工亦古人之詩非吾詩也乾隆間修縣志辟司採訪士曾素留意里中掌故條舉付局咸服其詳贍

孫星衍

子廷鑑

星衍字淵如一字苑如亦字伯淵號季逵又號薇隱小名喜陽湖人乾隆五十二年殿試第二人及第授編修散館置二等以部曹用故事一甲進士改部或奏請留館時大學士和珅知星衍名欲令屈節一見星衍不往曰寧得上所改官不受人惠也遂就職又編修改官可得員外郎或謂一見當道卽得之星衍曰主事終擢員外郎何汲汲爲補刑部主事總辦秋審屢遷至充沂曹濟道署按察使以母憂歸在官多所平反或引經折獄雖夙以循吏名

者亦有所不若也。幼有異稟，書過目成誦，雅不欲以詩名，深究經史文字音訓之學。旁及諸子百家，皆通其義。袁枚曰：天下清才多奇才，少淵如天下奇才也。錢大昕畢沅亦甚重之。其爲名人傾倒如此。自丁母憂歸，僑居金陵。浙江巡撫阮元闢詁經精舍於西湖，聘星衍及王侍郎昶送主講席。以經史疑義課士，旁及小學、天文、地理、算法、詞章，各聽搜討，書傳條對以觀其器識。請業者盈門，未及十年，舍中士撰述成一家言者不可勝數。淡於宦情，服闋後游吳越數年，終以河工償項故不得已再出，仍發山東以道員候補。署登萊青道，補山東督糧道。嘉慶六年引疾歸，尋客揚州，運署校刊全唐文，累主鍾山書院。生平立身行事皆蹈儒術，廉而不刻，和而介，屢以剛正不獲於上官。早歲文詞華麗，繼乃沈潛經術，博極羣書，喜獎借後進。所至士爭附之，尤好聚書。聞有善本，借鈔無虛日。金石文字及古彝鼎書畫皆能窮源竟委。故又工篆隸文，在六朝漢魏間不欲似唐宋八家。嘗病古文尙書爲東晉梅賾所亂，撰集古文尙書馬鄭王注十卷及逸文三篇，又爲尙書古今文注疏三十卷，蓋積二十餘年而後成。其專精可知。其他著述頗多，詳見書目。廷錄字小

淵諸生善詞

楊夢符

夢符字六士又字西躔號與岑武進人乾隆五十二年進士官刑部員外郎工駢體文翁覃谿學士推爲徐庾後身

錢夢雲

夢雲原名邁字企盧一字霞叔號雙山陽湖人歲貢生候選訓導八歲能詩稱神童嘗縮雙髻隨其父希宋先生往親串家一日盤供枇杷坐客以爲盧橘疑辨鋒起夢雲倚父榻誦相如上林賦盧橘夏熟四語曰旣賦盧橘又供枇杷何也一坐大驚盡以枇杷與之曰吾等愧食此果矣性通脫嗜飲噉喜談諧乾隆五十四年選拔學使愛其才定正薦聞其狂率易之棋第三品思力所至時入第二品

趙炳

炳字自怡陽湖人候選州同知少不羈父母以爲非禮法士意不悅之鄉俗謂之豁四而名與字轉晦豁謂不務正者炳行四故謂豁四毗陵之人無男

女少長無不知趙豁四其人者有口才好遊俠林爽文叛臺灣炳時客福建將軍幕福相國康安問將軍計安出將軍曰某有客膽識橫絕請見之乃見炳炳爲相國陳臺灣形勢阨塞及進退諸方略口吻張翕如倒峽傾水相國失聲曰奇才奇才炳時以州同知謁選欲奏請爲幕掾力謝不任後相國擒爽文定全臺自云皆不出炳指名動公卿間爭交納焉炳才既過人遇緩急又能出毅力銳自任浙運使柴楨故與炳厚約爲理柴侈自奉虧庫帑至鉅萬巡撫福崧挾以徼賄會調任兩淮挪淮課銀二十二萬兩彌浙虧爲淮鹽政全德奏參炳欲脫楨對簿自引劾甚力卒坐楨與巡撫皆斬炳與藩司歸景照皆遣戍事在乾隆五十八年未抵戍所伊犁將軍聞其名虛席以待炳戍伊犁以豪宕多材藝爲將軍所厚嘉慶初洪亮吉忤仁宗旨戍伊犁將軍希上意謂將假手願效黃祖殺禰衡以自爲功炳語將軍天威未可測盍密請而後行之從之不獲允洪抵戍將軍轉善遇之炳固有造於洪其爲將軍謀亦忠也嘉慶某年詔許贖緩歸歸後益自放車馬飲食衣服以及賓從之盛所至傾動其行事狙詐豪侈軼出常軌皆極可喜檢東華錄及清史各疆

臣傳可以見其一斑二十四年卒年七十五

高 荃子承鉅

荃字芳余武進人乾隆五十三年舉人幼勤敏篤志勵學爲文原本經術憚蘭枝李兆洛之師以明通榜選含山縣訓導含山僻陋無文荃因材施教由是始有解額子承鉅字式之受業兆洛之門能文慮事精敏

謝 珍

珍字寶齋一字瑞周武進人少聰穎性樸誠受業商城程國仁學問日進不以科名爲念耽易理終身誦讀不輟著易學贅言雖未成書而融會貫通至數十家皆能言其大旨國仁巡撫浙江招不往爲人慷爽無私曲樂道人善喜發揚潛德生平不希榮慕寵有隱君子風咸豐乙卯卒年八十一

憚 蘭枝陸孟甲

蘭枝字紉之武進人諸生窮經篤行善啓迪爲一時名師與同邑吳士模宜興吳德旋相友善專精經義尤深於詩同時有陸孟甲字申甫諸生工爲文博究羣書尤精史事論古今治亂得失洞徹本原

陳景蕃

景蕃字君仲號訥齋武進人諸生家貧篤孝友父疾衣不解帶者累月至勞極眩瞶猶侍左右不去博極羣書潛心理學造次必於禮從遊資雖中下一經指授不逾年立變

瞿曾輯

曾輯字秩山武進人乾隆五十四年進士授工部主事仕至四川鹽茶道解組歸僑寓金陵優游林下二十餘年與方茶山陶唐山卜鄰又與湯貽汾侯雲松等爲九老會園亭觴詠望若神仙詩文卓然成家兼工山水

劉遵陸

遵陸字澗楠武進人乾隆五十四年舉人廣東海豐知縣在任五年以年老去官既罷貧不能行留二年乃歸歸五年而卒年七十六道光十一年也敦厚誠篤學行醇備在官有惠政

洪亮吉

子鉛孫 符孫

亮吉初名蓮又名禮吉字君直一字稚存又字又蛭號北江初號藕莊亦號

夢殊又號對巖一號華封小字元陽湖人乾隆五十五年殿試第二人及第官翰林院編脩生六歲而孤家貧客公卿間資館穀養母客浙江學使王文端杰幕中時母卒弟藹吉詭言母疾甚趣之歸乃亟行距家二十里舍舟而徒方渡橋遇賃僕之父仇三得家狀號踊失足落水中流數里汲者見髮颺水上攬之得人有識亮吉者舁至家久之乃蘇五十六年充石經館收掌官以舊書十三經多譌俗白總裁欲更正之未能從也五十七年分校順天鄉試闈中拜視學貴州之命在貴州任疏言禮記宜以鄭康成注易陳灝爲部議所格教士以通經學古爲先黔士乃知向學嘉慶元年入直上書房於御試征邪教疏內力陳中外弊政爲當時大臣所忌隨引藹吉之喪以古人有期功去官之義乞病歸四年正月高宗升遐赴都哭臨四月充實錄館纂修官教習庶吉士會有與亮吉先後起官者座主朱文正公珪時爲尙書並譽之亮吉大怒以爲輕己遂乞病時川陝賊未靖欲有獻替顧編檢例不奏事乃上書成親王朱尙書珪劉尙書權之冀其轉奏成親王以聞有旨軍機大臣召問卽日覆奏落職交刑部治罪就逮西華門外都虞司羣議洵洵謂將

以大不敬伏法其友趙懷玉往見縲紲藉藁坐大哭投於地不能言亮吉笑謂趙曰味辛今見稚存死耶何悲也頃之特恩免死發往伊犁交將軍保寧管束五年京師早上親書諭旨釋令回籍旋得甘雨自此枕藉墳籍放浪山水者十年卒得告終家術既歸自號更生居士十二年歲大稔有司勸不成災飢民剝樹皮以食乃力請當道設振局捐金爲之倡所全活數十萬計卒年六十四嘉慶十四年也其學無所不窺詩文有奇氣少與黃仲則齊名江左號洪黃仲則客死亮吉千里奔其喪世有巨卿之目後沈研經術與孫淵如論學世又稱孫洪云工篆書體與淵如亦近

鉛孫字孟慈一字祐甫小字壽眉自號青埵山人亮吉長子嘉慶三年舉人幼從莊珍藝達甫兩先生授經而與同縣莊曾儀丁履恆黃載華黃乙生陸繼輅陸耀遙莊綬甲劉逢祿爲文學之友年二十六江南鄉試中式以國史館謄錄議敘選授湖北東湖縣知縣東湖當楚蜀之交水陸商賈輻輳號稱難治至之日修六一書院節養廉爲膏火召諸生自課之決諸事用法常嚴曰楚人畏威而不能懷德吾不敢博寬厚之名也在官十閱月遽卒年四十

四卒之日邑人相弔曰吾賢令死矣吾何恃安乎皆哭其學博聞強識於經通小學於史通地理氏族目錄職官而於亡書之學尤精拾遺補缺足以成一家言友朋相聚處好辨論古今一言不合至負氣相爭而酒酣以往每每痛哭以舒其鬱勃慷慨之氣溫溫然未嘗出一言或詰之曰口舌何爲顧力行何如耳著作甚富其世本輯補一書刻資出江都秦氏遂冒秦名符孫字幼懷國子監生亮吉次子精研史學著有齊雲山人文集

莊達吉

達吉字伯鴻陽湖人一作武進人所子諸生官咸寧知縣工詩以詞章受知於畢秋帆王蘭泉又精考據訓詁之學校刊三輔黃圖淮南子諸書爲世所稱通曉音律好作篆書畫學錢文敏三十後究心靈素時時有所論述其官咸寧也嘗冬夜入獄閱囚囚二十餘人語之曰歲行暮矣若曹豈欲一歸省父母妻子耶衆皆泣不敢應乃慨然曰限開印前一日各自投到無負我遂悉縱之至期二十餘人中惟少一人方擬遣役致諸其家而其人已馳至叩頭曰距城遠門且閉幾不得入咸寧人相傳以爲美談云

毛燧傳

燧傳字洋溟一字陽明陽湖人諸生少孤學古之道爲古之文其人坦易通適而文跌宕尙奇氣

莊有可

有可一名獻可字大久武進人諸生少富於詩後棄去注周禮其從祖方耕先生極賞之洪稚存謂其似蔡邕獨斷博通諸經傳於春秋功力尤深自言讀至二千餘遍能於字數定歲差法客京師十年與校中祕書道光初卒年七十九

蔣雲一 弟承曾

雲一字漢房武進人熟史學工篆隸深於易經從弟承曾字松如學亦相似
董達章

達章字超然號定園武進人少不慧二十餘文忽奇突學詩半年騫入杜韓之室務爲巉刻沈壯晚乃歸於宋人以瀏澆淒泊爲工喑嗚叱咤悲憤雄厲之氣時見於言客京師紀曉嵐程魚門甚重之

錢夢蘭

夢蘭字季重後以字行號黃山陽湖人少以名家子負雋才頗駘宕不自檢飲酒使氣有不可一世之概然標尚志節無妄交交者多殷勤之思詩才橫逸不就繩墨於長短句尤工落落負奇不治生產及壯屢舉不第自顧不合於時視天下士更無當意垢衣敝履蹢躅行街衢中及老乃一混於酒囊無杖頭錢時從故人乞酒資飲肆中與傭販雜坐歌呼大噉醉則倒於途有樓數椽橫牒缺其半洞然多餘孔又無几榻之屬興則就塵板坐倦則依塵板寢歲除之夕友人聚語曰比日不見黃山殆餓斃乎相約過訪門無聲息潛從樓上仰窺則方然一燭與妻互對各執一卷有自得之意叩之不再食者三日道光元年大疫卒前一日以書抵湯韻清曰我死以後事累若矣

左輔

輔字仲甫一字蘆友號杏莊又號維衍亦號雲在陽湖人乾隆五十八年進士仕至湖南巡撫任安徽霍邱縣知縣時治一載其冬有年父老數十人盛米于筐有稻有秔豚蹄鴨雞傴僂提攜造於縣門曰邊界之鄉尤擾盜偷自

耶之至吾民無事得耕種吾田今幸熟有此新穀皆耶之賜以爲耶嘗輔曰天降豐年樂與父老食之則又曰往耶未來吾民之猪雞鵝鴨率用供吏餘者盜又取之今終歲不一失是耶爲吾民畜之也是耶物非民物也輔笑而受之亳州之民有訴於府者曰亳舊寡盜今而多其來自霍邱霍邱左耶不容盜以旤亳願左耶兼治之任泗州知州時民婦不知紡織設局製具募織婦教之碭山縣李家樓決口泗州淹沒度地建廠躬親撫卹并以被災極重申請入奏得振卹並免賦三年盱眙民孫國柱誣周永泰謀大逆巡撫具奏時河南陷滑縣天子命總督那彥成復滑後卽統大兵會江督赴勦時輔署潁州府檄先帶兵往輔力言泗屬無邪教單騎往案之得國柱誣告狀大獄遂息任廣東雷瓊道時昌化縣將復開銅鑛輔以黎人不辨鑛苗又無厚力勢必仍藉漢人而聚匪爲姦必生黎衅且銅船內渡嘗屢被劫今雖海洋靜謐當杜其漸請止之任巡撫時以屯丁失業苗租過重冗費宜裁積逋宜免列款具奏得俞旨官轍所至風俗一變條教皆手自爲之懇摯如嚴師恩誼如慈父故民樂從以老休致里居卒年八十三其爲文章醇雅尤工於詞

陸壽昌子鏞

壽昌號鳧岡武進人乾隆五十八年進士好學博通經史善古文辭旁及象緯輿圖算學工畫山水性耿介子鏞一作鎔字子陶一字麗生有文學工詩亦精繪事花鳥尤勝

臧庸弟禮堂

庸初名鏞堂字拜經號在東武進人琳玄孫性沉默樸厚學術精審著作頗富皆有補於遺經與同里顧文炳從餘姚盧文弨遊盡得其學儀徵阮元十三經注疏校勘記經籍纂詁二書出庸搜錄者爲多德清許宗彥稱其好學當求之唐以上

禮堂字和貴庸弟少溺苦於學家貧無僕役躬親執爨以養父母父病瘡畏寒惡火乃以身溫被父喪三日不食三年不入於內母病刲股以進籲諸神請減壽一紀以益母壽母愈而禮堂竟夭矣年止三十其初娶也懼婦不能孝其親作七言辭以教婦婦至使人抗聲朗誦俾立聽畢而後合卺朱文正公嘗稱其文行阮文達公撫浙聘襄詒經精舍以持服避之許冠墨纓方入

使院友于兄弟有過則諫必改乃已好許氏說文嘗著說文引經考十三卷
段玉裁王引之皆歎其精確又嘗錄傳記孝子孝婦孝孫諸節行凡數百卷
尤有裨於倫紀云

王曰旦

曰旦字殿章號學愚其先本歙人父震官布政司理問晚歲以業蹉來常州
曰旦隨寓遂爲武進人有至性事父盡孝乾隆乙巳大饑父子倡議紳富設
粥廠施寒衣曰旦與兄禹敬司其事全活甚衆父卒哀毀盡禮撫庶弟及兄
子如己子以孝友任俠名重郡邑一時賢士如毛燧傳趙懷玉左輔張惠言
吳士模惲敬吳德旋錢伯垌莊宇逵張琦李兆洛楊嶠谷陸繼輅皆相友善
曰旦重然諾好施與親友有困銳身急難家故饒裕因以中落左輔通籍後
困甚求助時曰旦已貧假於人以濟之而歲償其息未嘗以告輔輔旣貴絕
不一往干也張惠言卒於京師妻子扶襯歸里貧不能僦屋曰旦聞之曰皋
文吾夙交可使其骨肉失所耶首傾囊爲倡遂以集事吳二安六十喪子曰
旦爲置媵踰年而舉子焉平生行誼類此者多不勝舉所居齋曰愛石山房

嘗繪圖命題一時名士題詠者數百人其辭散見於各家集中好書畫名蹟收藏甚富朋儕日集山房展玩有好之者卽舉以爲贈無吝色於近人書雅好惲正叔擇所藏尤者刻爲愛石山房帖曰吾以是尙友其人也間作詩自娛冲和澹泊不假雕飾如白雲在天卷舒自得其稿曰天籟集未及刊燬於咸豐庚申之難曰旦以嘉慶己巳正月十日卒年五十四子國棟集名人所贈傳志碑銘之文爲一卷曰徵銘錄道光庚戌郡守陳雲乃爲之刊行

金 厰

厰字廓明武進人行己高潔其詩堅蒼深峭一字不近時人而復軌於古法是特立於羣流中者其學私淑顧文端高忠憲與同志靜坐讀書興起甚衆

徐書受

書受字尙之武進人乾隆四十五年副貢由四庫全書館議敘歷官南台知縣少食貧長多故彈鋏依人恆有四方之役羈旅道塗所作往往牢愁激楚大抵取法在孟東野張文昌間才情諧唱又兼學元白與邑人趙懷玉黃景仁孫星衍洪亮吉呂星垣楊倫稱毗陵七才子書受爲茶坪詩老曾孫學有

本源少耽著述以古道自期性情純摯內行可欽其詩悱惻纏綿意由心發古來丞尉每有奇才其香山柳州之流亞歟

莊寶書

寶書字然乙小字梅生武進人監生由四庫全書館議敘官聊城縣丞工詩善書詩取裁大歷十子淺而實深薄而能厚置之錢郎間了無差別少困名場壯爲下吏而清和閑雅一唱三嘆絕異於呵壁問天縛船送鬼者書學歐陽率更後直窺晉人之室崛強夭矯無一平筆

呂星垣

星垣字叔訥號映薇又號應尾武進人諸生歷知贊皇河間知縣能決疑獄減輕徭賦民甚便之工詩古文辭高古簡潔自成一家操筆立就少卽以文學名薄遊大梁見童二樹寫梅愛之遂取其意以寫竹比至都見蘇虛谷筆嘆爲不可及乃不復爲間作寫意花卉高淡之趣能得元人意書亦冷雋

李慶來

慶來字章有號鹿籽英子陽湖人貢生山陽縣訓導英故善書慶來承家學

幼而能之先是錢伯垞以書名天下三十年矣慶來年二十許最後出而名與之齊時稱錢李嘗以應順天鄉試至京師見推於翁覃溪學士而長洲韓桂齡尙書歸安王勿菴侍郎尤重其書寶之與劉文清公書並云博學工文頗事著述

莊宇達

宇達字達甫武進人諸生有雋才躋於有司其父耘石謂之曰自吾祖入翰林以官籍解於省者六人昔之易今之難也砥行立名又每有高世之志嘗次古君子之見於傳而佚其名者自上世迄周凡若干人頌之以詩爲一卷夫高嚴窮谷之中終已不通於世者豈少也哉惜乎其不得盡傳之也司馬遷曰閭巷之人非附青雲之士惡能施於後世孔子曰君子疾沒世而名不稱焉然則讀宇達之詩不知者以爲頌古人其知者可以哀其志矣嘉慶初舉孝廉方正以經教授鄉里一時名士皆出其門

陳紹琦

紹琦字功魏號荷溪陽湖人警穎絕人家貧無書入村塾翻閱立盡尺許卽

能背誦嘗躬種瓜得錢供醉與許亦魯袁廷吉交許書蕉葉索瓜紹琦鐫詩於瓜以報傳爲韻事

鄒牧

牧字牧村號北江武進人通許氏說文解字之學習篆籀善刻印家貧性狷介不苟客畢秋帆幕幕中諸名士皆好之詩詞惆悵述情語多危苦

唐翊華

翊華字寄舫號竹虛武進人執玉從孫安徽池州府東流縣典史嘗客畢秋帆尚書幕以商邱宋氏所藏華山碑拓本飛白行世爲書家所寶與洪亮吉友善

莊曾儀

曾儀字傳永一字心崖陽湖人監生伉爽真率與人交一往深摯終始無間朋友有過正容規之客京師當世賢達無不欽其行誼比之黃叔度好自裝池書畫碑帖琢硯刻小印皆絕工篆書學碧落碑行書學趙文敏

徐準宜

準宜字仲平號泉初武進人乾隆六十年舉人官順天府糧馬通判博學多聞通天文地理及九章算法讀史論古有特識工書涉歷魏晉唐宋而於趙松雪尤精研有得刻寶晉齋帖性耿介事上接下以必誠丁母憂歸居鄉十年卒

崔景侃

景侃字瘦生陽湖人原籍山西永濟工詞善繪蛺蝶其紅葉詞最流傳洪稚存呼爲崔紅葉

伍嗣興

楊奎曙

嗣興字磊軒陽湖人諸生工詞其時又有楊奎曙者亦以能詞聞奎曙字容光武進人

王 甌

甌字瑤舟陽湖人學宗高攀龍治經不倚傳注但取經文旁推交通嘉慶中卒

吳士模

士模字晉望武進人少壯嗜學至老彌篤沉潛程朱而出入諸家一以躬行實踐爲本深於毛詩探諸家之說以求其是有所不通則自出所見皆原本聖賢之意和平其性情沖澹其言辭於道德之際性命之微尤三致意焉以爲詩之教溫柔敦厚而說詩者往往叫囂忿戾豈不已背聖人垂教之旨乎以斷章逆志之義求之則何情不可通亦何情不可平而必執一人之意見以概衆人之心哉士模之學醇而雅其言微而廉方之歐蘇呂嚴可無愧矣

奚賓

賓字蕉峰武進人諸生生而誠魯稍長刻勵讀書嘗夏夜苦蚊蚋被錦衣納雙足甕中端坐諷誦輒達旦年六十始貢太學候選訓導未授而卒年逾七十猶歲復五經一遍其嗜學汲汲若不及務深闢奧突尤精研四子書又選定史記漢書莊子離騷古唐詩皆手寫成帙

莊關和

關和字有鈞亦字酉君武進人幼聰穎十二三卽善騎能釋轡馳驟十五工舉子業繼而爲窮經之學采漢唐諸家斷以己意著詩說又從事尙書以爲

堯典授時非深通星歷家言不能得其旨禹貢治水非深諳水土之性不能師其意於是治天官書及中西算法博覽河渠輿地諸書旁究風角占驗之術久之憮然曰象數絕學苟無師承勿能進也遂輟書未竟其業省試屢薦不售族子振觀察河北延主懷山講席振卒闕和乃歸

湯自銘

自銘字西箴號崑河武進人幼端慤有至性母病關隔醫者束手乃流涕交頤日禱於神誓以身代寒暑無間母病雖篤而綿延者三數年人皆以爲誠孝之感家貧弟不能娶爲之娶讓屋以居之見窘於債無以償賣屋爲之償有以貧鬻妻者傾囊爲之贖不足徧告同志飲之受業潘振聲聘君研精理學以實踐爲務著書課徒不爲進取計乾隆四十一年卒年八十五

史次星

次星字右章又字和叔武進人諸生髫年穎悟誦讀兼人比弱冠凝然如成人志學彌篤遇耆長尊宿奉手請益孜孜無倦色蔣和寧深器之遂以能詩稱旣屢試不售二親沒卽絕意進取橐筆爲諸侯賓客所至倒屣而所主必

朋舊合意者未嘗泛及介不容私或求關說揮之若浼積糈入稍給朝夕終不買田宅求饒益親友緩急相告時時傾其囊常曰財以利用也用之當人我何間焉封己自守有財何益道光六年卒年八十有六

唐本銓

本銓字仲襄武進人諸生爲垣子幼孤力學博極羣書尤精天文占驗之學每年雷始發聲及陰晴水旱言之皆奇中病咯血卒所著書未就人咸惜之

孔

璞
蔣經元

璞字啓璠陽湖人聖裔也居後寨橋讀書過目成誦少補諸生尋卽棄去治兵權謀書及形家言兼好黃白變化之術自稱東南奇士晚歲或間數年一至歸美橋與吳德旋作竟日談謂德旋曰子有慧業可與論道然勢不能無嬰世務要不可使此心汨沒於流俗耳璞於書無所不讀然絕不著書爲文或問其故璞曰三教聖人之書昔人闡發已盡王文成能融貫其旨而傳習錄一書未免多事其持論大率如此家故貧甚時爲人相墓以給食云璞有甥曰蔣經元嘗剖肝療母疾鄭環爲書其事表章之

屠清渠

清渠佚其名武進人善畫山水

戈裕良

裕良武進人以堆假山著聞精此藝者清初張南垣爲最康熙間有石濤和尙其後則仇好石董道士王天子張國泰至乾嘉時裕良堆法尤勝於諸家如儀徵之樸園如皋之文園江寧之五松園虎邱之一榭園及孫古雲家書廳前山子一座皆其手筆嘗論獅子林石洞皆界以條石不算名手人詰之曰不用條石易於傾頽奈何裕良謂只將大小石鉤帶聯絡如造環橋法可以千年不壞要如真山洞壑一般然後方稱能手至造亭臺池館一切位置裝修亦其所長

△徐應熙子會

應熙字黼庭號海陽武進人植子乾隆庚午順天經魁湖南衡山縣知縣著有筠宜書屋詩文鈔四卷

會字湘漁又字湘于號鐵珊應熙子畫墨梅疎勁有致

清代毗陵名人小傳稿卷六

邑後學張惟驥季易纂

吳光悅

光悅字星一陽湖人嘉慶元年進士官至江西巡撫原名廷燮殿試時有同姓名者上親更焉少食貧砥志勵學早擅文譽通籍後研求治體於古今政治得失之本而得其遷變開塞旋轉之機當代憲典時世情狀又悉綜練所擬批答諭旨恆稱上意機廷委重時時從重臣讞獄藩陽湖北山東沈心端度慎察本末與輕重比無有枉撓恬和無鋒鏑而日迴霜肅莫干以私內直久外省大吏陳奏利病異狀風俗異宜刑法異尚既盡知之故在諫院所建白務權劑緩急求其切於施行者疏多留中未嘗剔一事擊一人以自爲名癸酉以京察選授寧國府知府時兩江總督百齡前爲湖廣總督光悅讞獄時所鑄級者也銜前事以承審部控案有所平反深文持之以不實劾奏褫光悅職甲戌援例開復乙亥選福建建寧府以親老告近改浙江處州府旋

署杭州嘉興等府所至辦治道光元年辛巳丁母憂癸未服闋補直隸保定府畿輔郡綰轂天下劇繁稱最光悅張綱絜目不勞而理甲申授河南河北道分守漳衛懷三府兼管黃河北岸黃沁衛糧祥河下北曹考五廳堤埽工程儲焚相捷屬役夫丈身駐工所晝夜巡視所督上下三省交汛五百餘里里有分巡立簿賑總之汎弁勤惰兵役聚散水勢漲涸隄形安危晷刻畢輳以相檢稽瞭若指掌莫遁銖黍河帥下其法以爲各道式乙酉升湖南按察使丁亥升湖北布政使甫三月奉召授都察院左副都御史蓋有間之者言其老憊故也既廷見奏對壯敏上意益嚮用之己丑簡放江西巡撫江西毗連閩粵贛州南安尤錯山谿險民囂悍時煽聚攻剽病商旅或掠人口質以求贖刼殺之獄日上光悅至則請慎擇長吏寬其考成措置經費以裕其用明賞罰以作吏氣而重購募以絕匪蹤量撫綏以開其悔悟且請照福建刼質加等之例犯從重比以杜其萌上皆從之由是量能授任幹吏爭奮士無匿奸民知向方時朝議鹽法曰刼弊由奸私當減官價以敵之緝私梟以杜之光悅奏曰官鹽有價有課有費私梟止有價而已卽多減勢不敵緝梟急

懼轉爲盜鹽之於民猶布帛菽粟茶烟竹木也聽其買賣任其流通關津征稅遠近利賴若設官征課於場竈民運販者既出課稅卽任其所之則私梟皆良商國課裕而民食便上然其言下其議直省督撫議竟格辛卯五月積雨大潦郡邑多懼其災光悅旣請發帑以振又捐俸貶食勸分以濟之輪滯聚平市糶所以綏輯之者無不曲至奏截留漕米八萬石以裕民食民以忘其災而光悅遂積勞遘疾卒年七十三

張惠言

子成孫

惠言字皋文鄉舉時名一鳴武進人嘉慶四年進士蓋前後七試禮部而後遇年三十九矣六年散館以部屬用座主朱文正公珪以惠言學行特奏改授編脩充實錄館纂修官七年卒年四十二文正屢薦達之而惠言斷斷以善相爭文正言天子當以寬得民惠言言國家承平百餘年至仁涵育遠出漢唐宋上吏民習於寬大故奸孽萌芽其間宜大伸罰以肅內外之治文正言天子當優有過大臣惠言言庸猥之輩幸致通顯復壞朝廷法度惜全之何用文正喜進淹雅之士惠言言當進內治官府外治疆場者嘗曰爲人非

表裏純白豈足爲第一流哉始四歲而孤年十四卽爲童子師治篆書初學李陽冰後學漢碑額及石鼓文嘗曰少溫言篆書如鐵石陷入屋壁此最精晉書篆勢是晉人語非漢中郎語也爲庶吉士時奉命詣盛京篆列聖加尊號玉寶少爲詞賦擬司馬相如揚雄及壯爲古文效韓氏愈歐陽氏修後乃專治易禮言易主虞氏翻言禮主鄭氏康成微言奧義究極本源於古今天人之統紀言之皆親切有味天下讀其書者稱皋文先生兼工詞其詞及古文能別開生面獨成一派世所稱陽湖派古文常州詞派者皆自惠言啓之也

成孫字彥惟惠言子修潔博習好沉思工駢體文精小學算學

張琦

琦初名翊名與權又名季鷹字翰風號宛鄰又號默成居士陽湖人嘉慶十八年舉人道光三年以舉人發山東權鄒平縣事山東吏倚錢漕耗羨爲生歲稔則無所入而供億不能減故相率諱災是歲鄒平旱琦以臘底視事見田皆龜坼麥未種卽具牒報災以秋冬無雨不能種麥告明年正月赴省呈

牒布政使面言狀布政使朱桂楨言於巡撫破成例入奏因鄒平得緩征者十六州縣民有失物誤訟於長山歸獄於琦琦曰汝失物地大樹北大樹南也曰大樹北曰若是則我界也民愕然曰誠鄒平耶卽不以數匹布煩父母官持牒竟去尋調署章邱章邱民好訟月收訟牒二百餘紙院司道府五署吏皆章邱人多走書請託倚撫短長無虛日琦涖任歲餘五署無一紙至而結新舊事二千有奇亦無一案翻異控及五署者忽鄒平民來赴愬琦謝遣之則號咷曰自父母去鄒平民受屈者多矣知父母不能越境理事私念此情得白諸父母前卽不啻伸雪耳聞者爲之泣下乙酉補館陶會天旱風霾沙塵壓麥苗皆死飢民聚掠之案積十餘起琦涖任後得大雨嚴捕倡掠者又勘富民閉糶居奇狀分別按治民大服因請普賞口糧入兩月館陶徧小琦所造應振戶口冊視鄰近大邑數且倍大吏訶之忽奉詔責問饑狀甚切乃按臨災區災民迎訴振弊無不至惟館陶得實始劾罷尤玩視者數人而厚慰琦旣而鄰邑蝗起蔽天日毗連館陶處若或界之無一跂入者先是琦在章邱蝗自東府來及界退館陶人聞之未信也至是皆咤爲異事及秋大

雨雹積尺許皆在不耕之地治館陶七載歲屢豐無牙角耗閭閻殷富成都會焉士有訟者閱其詞不直則曰課汝文不至訟乃至耶試責以文不中程後乃決事士訟遂稀其仁術兼濟類如此縣無良醫琦見病者卽診之然終以入署爲艱乃設惠民局命族子賜司其事貧者並給藥疑難甚則以責琦全活無算道光十三年卒於官年七十卒之日味爽南關居民見鼓吹幢蓋導琦行於彩雲中爭傳爲館陶城隍神少工詩古文及分隸與兄編脩惠言齊名稱毗陵二張五言律得仲宣太冲意書法移漢分入真行又以北朝真書斂分勢與兄惠言同撰詞選奧突始開倚聲之學由二張而始尊尤精輿地於山川阨塞形勝及古今沿革戰守成敗得失之故上下數千年如指諸掌也

楊傳榮

傳榮字杞懷晚號慕如武進人嘉慶三年舉人容城縣知縣性鯁直不得志於上官免歸治三傳毛詩有成書

陸繼輅

繼輅字祁孫又字又商一字商對別字季木號靈莊又號脩平居士陽湖人
嘉慶五年舉人九歲而孤生母林太宜人桂實長成之儀幹秀削讀書夙成
文彩四照音聲清如鶴唳吐辭雋婉常傾座人當代先達有倫鑒者爭羅而
禮焉不肯輕涉世事惟肆力於詩清溫多風如其人姪耀遙亦有名於時世
稱二陸與人交綢繆婉摯篤切劘之誼每朋尊促坐清酒百壺歡笑間作已
或觸所聞見微詞致規因極論得失欲剗心相示涕泗橫流不知者以爲酒
狂也自登鄉榜入試禮部黜以大挑二等選合肥縣訓導甚得士譽上游薦
以才任治劇又修省志董成事以勞議敘授江西貴溪縣知縣在官三年政
治清肅因疾乞休既得請旅省城行有日矣而竟不起年六十三道光十四
年也繼輅之學詩爲最亦擅古文辭兼工詞始學詞疑世所稱學蘇辛秦柳
者之不類質之張惠言惠言曰善哉子之疑也詞故無所謂蘇辛秦柳也自
分蘇辛秦柳爲界而詞學衰乃益取溫庭筠韋莊以至王沂孫張炎數十家
讀之窺其所以不能已於言之故同時又有惠言之弟琦及左輔憚敬錢季
重李兆洛丁履恆姪耀遙相與引伸惠言之說於是盡發溫庭筠韋莊王沂

孫張炎之覆金元以來俚詞淫詞叫囂蕩佚之習一洗空之毗陵之詞始彬彬盛矣自是二十餘年周儀暉魏襄蔣學沂董士錫趙植庭錢相初楊士昕董基誠董祐誠管貽蔣方履錢又十數輩皆瀟苦爲之其指益深遠而言亦益文駸駸乎駕惠言而上而倡之者則惠言一人也其後有董毅楊傳第彌篤守常州一派

陸耀燾

耀燾字劭文小字阿劭武進人諸生道光元年舉孝廉方正官淮安府學教諭意度沈敏和柔慮事周慎曲當人情爲人謀必竭忠告或相倚任讜然無私故所至見敬信惟恐失之詩宗錢劉能自成家酷嗜金石文字隨所至搜輯摹拓暇輒矻矻伏案考證卓然可傳於世亦工詞

楊元錫

元錫字雲珊武進人監生治經窮漢學爲詩宗李白恢張雄奇踔蹕天地揮霍日月以寓其不可一世之概嘗游大梁與客登吹臺酒酣集王勃滕王閣序字爲七言律十章振筆書紙雲涌鸞發座客矐眎謂高適杜甫後千五十

餘年無是會也

陳森

森字少逸武進人詩兼韓孟溫李之勝集中咏橐駝三十韻酷似石鼎聯句

周夢熊

夢熊字漁卿陽湖人父履端官山東鄒城知縣鄒城君之仕也以入貲非其志也故課夢熊讀甚嚴夢熊亦嗜學雖多病未嘗少輟吳彞主鄒城講席見夢熊詩奇其早成爲刊板問世夢熊謝不敏然益奮陸繼輅以事過鄒方與鄒城君語夢熊遽趨出再拜熟視喜躍自云不意得相見繼輅爲留三宿始別去送者皆返夢熊獨與繼輅共車行數十里唏噓不自勝若繼此不復相見者以嘉慶十一年正月初二日卒年二十一

畢訓咸

訓咸字莘農武進人諸生於古無所不學志足以立事才足以致務而其狀峻峻如不能雖與之遊者莫能測作詠史詩百餘篇揆譏成敗斟酌道理皆有條驗以其詩求其所學其有所用而行之也審矣

畢簡

簡字仲白陽湖人涵次子工山水筆致秀逸絕無滯機畫趣似勝其父亦善寫意花卉客陳曼生幕與錢叔美改七簾同聚桑連理館文酒之暇或合寫巨幅下筆如出一手

趙學轍子京錫

學轍字季由號蓉湖陽湖人嘉慶四年進士由御史出守湖州以廉靜稱襟韻蕭遠與山野布衣交儼然寒素士也善書學米南宮而上窺顏平原晚年專學思翁乞者日不暇給乃戲寫墨蘭應之人得其畫益喜然不多作亦工篆隸書幼習篆刻精朱文自謂得沈凡民祕傳三十後卽棄去子京錫學歐陽率更秀勁畢肖

余形

形字子山號右賓武進人諸生善畫竹不取重值流傳甚遠海外購之間作山水

陳鏞

鏞字淥晴武進人畢涵弟子擅山水仿麓臺官嶺南丞尉卒年八十餘

楊鼎高

鼎高字羹調陽湖人有夙慧九歲解聲律受業於莊徵君宇達徵君生徒數百輩每鄉會試榜發中式者或六七人少亦二三人而鼎高南北十試輒被放怡然安之尤好爲詩同時之工詩者張琦丁履恆洪飴孫周儀暉管繩萊諸子皆磊落任氣每有讌集操筆千言或數百言鼎高獨短篇清遠夷曠時出諸子右雖諸子亦時自失也其標格如此嘉慶二十一年卒年四十三

許沅

沅字仲青陽湖人諸生砥節礪學尤粹於經學者稱貞通先生嘗游京師名公卿爭遣子弟受經當時京師語曰常州二許文中之虎謂沅與同郡進士融也然卒不遇遂絕意用世專治經造就後進言漢儒訓詁繁博多破碎宋儒較之又空疏鮮據集諸儒說折衷漢宋一歸純粹著書多種又兼精數學

周儀暉

儀暉字伯恬陽湖人嘉慶九年舉人大挑二等選授安徽宣城縣訓導俸滿

擢陝西山陽縣知縣調鳳翔以老乞休去之日民皆見思其未仕時嘗客廣東當道爭相引重儀暉無所干歸裝惟積詩盈尺體貌枯瘠而才思瞻逸詩宗漢魏六朝出入三唐諸家奄有其勝道光二十六年卒年七十

李兆洛

兆洛字申耆號紳琦武進人嘉慶十年進士選庶吉士本無錫夾山王氏明神宗時有本成者育於武進三河口李氏遂冒李姓兆洛幼聰穎讀書日能讀百餘行藏書逾五萬卷皆手加丹鉛校羨脫正錯誤矢口舉十三經辭無遺失自漢唐及近世諸儒說條別得失不檢本尤嗜地理學購各省通志較互千餘年來水地之書證以正史刊定顧祖禹讀史方輿紀要與原文之不符者散館選安徽鳳臺縣鳳臺爲壽州分縣民悍同壽而地特瘠涖任知漢芍陂在邑境勘之設溝閘督耕耘民以有歲邑多豪猾爲逋盜藪者相望常騎率健勇循行閭里每出不意得其魁又察其中有重氣節矜然諾者撫用之盜以斂戢嘗曰鳳潁泗三府州揀集五千人可以方行天下然唯其豪能用之官用之必帥之千里外或客兵勢盛足相鈐制乃可否則驕蹇難爲降

伏已而奉諱去官主江陰暨陽書院四方艤舟者問字無虛日乃各就其性情所近分途講授既久多有能得其一體於古今文辭之行世者無不披覽時論盛推歸方崇散行而薄駢偶兆洛謂唐宋傳作皆導源秦漢秦漢之駢偶實唐宋散行之祖因輯駢體文鈔一書以示規矩序略曰自秦迄隋其體遞變而文無異名唐以來始有古文之目而目六朝之文爲駢體爲其學者亦自以爲與古文殊路夫氣有厚薄天爲之也學有純駁人爲之也體格有遷變人與天參焉者也義理無殊途天與人合焉者也得其厚薄純雜之故則於其體格之遷變可以知世焉於其義理之無殊可以知文焉文之體至六代而其變盡矣沿其流極而泝之以至乎其源則其所出者一也生平論文蓋如此故是編可以正駢體軌轍而兆洛實欲以是溯古文之源也嘗顏其室曰養一晚因號養一老人學者稱養一先生歿後入安徽名宦祠著作頗富世所行日知錄集釋一書實兆洛及毛嶽生吳育三人合力成之後爲黃汝成付刊黃遂尸其名亦考古者所宜知也

魏 襄

襄字贊卿號曾頌武進人嘉慶十年進士河南卽用知縣補永寧大計卓異調洛陽去永寧時士民多攀轅涕泣任洛陽值大饑襄方入都引見比回任已後報災例期又值滑匪擾亂兵差往來繹騷襄具文上官不俟批答卽單車親勘饑區編保甲發倉穀以振至春復設粥廠百餘課最賞五品銜丁母憂服除選山東招遠縣調惠民縣鞫獄多平反丁父憂服除選雲南某縣洊升知府擢江西廣饒九南道以關稅不如額降級繳償開復選甘肅平慶涇道內擢太僕卿初襄父元以醫名於時襄承家學邃於醫其內擢京堂以醫聞於上將備太醫供奉之闕文章淵雅尤長於詞

劉嗣綰

嗣綰字醇甫號芙初一號櫻寧子陽湖人嘉慶十三年會試第一元卷進呈仁宗曰朕知其名久可謂得士矣廷試改庶吉士授編脩少穎異識量過人早游京師知名當世掄元時將及五十矣年六十下母憂以毀卒爲人和平安雅見義無不爲雖屢空晏如也其詩文少作明麗居多中年後心力就衰而沉博排晷晚更清適駿邁以快厲之筆達幽隱之思身居京國心繫家園

歸詠循陔出仍負米迹其生平蓋窮而通通而窮者也

趙植庭

植庭字樹三一字曙山號公槐又號仲懷陽湖人嘉慶十三年宛平籍進士選庶吉士給假歸娶散館改刑部主事歷員外郎郎中道光二年以京察差委戶部坐糧廳四年任滿回部九年以截取選授湖北安陸府知府奉旨仍回刑郎中任時值仁宗誅殛權姦後當事者以謹默容身爲尙成苟且因循之習訖道光中葉而加甚植庭欲隱爲補救亦惟其職之所當盡其在刑部充總辦秋審處治獄必反覆推求曰吾不能格外苟其生何敢草率速之死也十一年卒於官年四十九詩格謹嚴而意致冲淡工詞善繪山水

丁履恆

履恆字若士號道久晚自號東心武進人嘉慶十三年召試二等選授贛榆縣教諭擢山東肥城縣知縣有惠績爲學不持漢宋門戶詩文負盛名尤好經世之學性亮達未嘗問家人生產事至朋友緩急必傾身爲謀引誘後進如恐不及

龔 鏜

鏜字聲甫陽湖人嘉慶十四年進士官至內閣學士降鴻臚寺卿爲御史時廷臣以諫止東巡奉旨切責衆懼莫敢言鏜齋沐繕封事瀕行顧闈者曰明午不歸若當於西市視我詰朝啓奏不之罪

錢相初

相初字申甫陽湖人夢雲子嘉慶十五年舉人報捷者至方奠雁莊氏里中人傳爲美談喜爲詩得王次回疑雨集大賞之旦夕吟諷多擬爲閨房贈答懷人詠物纏綿旖旎之作以示陸繼輅繼輅力規之遂盡焚其稿而放筆爲歌行盤硬抑塞磊落嘗傭書江淮間後復客中州登臨懷古篇帙日繁富亦工儷體文

黃載華

載華字璞山陽湖人嘉慶十六年進士父魯傳好聚書而工弈載華以家多藏書力學以至於成初補學官弟子卽以文行名於里中後肄業國學復以文行名於京師其應順天鄉試也試之日僮奴誤以常所誦習書一巨冊雜

筆硯置一筐中載華不及檢據攜以行比至舉場親王大臣數十人環坐啓
筐而書見大駭請旨交刑部尙書金光悌時爲刑部郎承詢載華茫然不知
書之所從至而僮奴已知棘闈不可攜書攜書當獲罪大悔恨痛哭詣刑部
陳狀光悌察其誠顧不可以訓載華曰易耳凡懷挾者便翻閱耳某讀此書
素熟公不信請爲公誦之至終卷不誤一字光悌驚歎以告侍郎周興岱與
岱聞於朝事得白

管貽蔭

貽蔭字芝生號樹荃陽湖人幹貞孫嘉慶十八年舉人河南固始縣知縣工
詞

高星紫

星紫字次薇武進人嘉慶十八年舉人官甘泉縣訓導工隸書善畫刻玉堂
楷法帖

董士錫

士錫字晉卿一字損甫武進人嘉慶十八年副貢年十六從舅氏張惠言遊

承其指授爲古文賦詩詞皆精妙而所授虞仲翔易義尤精家貧非客遊無以爲養道光辛巳士錫房師霑化蘇君觀察淮揚招士錫於幕蘇猝染時疫病甚士錫侍疾謹或告鄉試期迫盍舍去士錫曰吾受吾師知遇之恩未能一日報今吾師疾病吾遽舍之而行非特無以酬吾師且重負吾師也卒不應試留侍疾閱數月蘇乃愈南河總督黎襄勤公素知士錫才及是賢其所爲聘請修續行水金鑑因草例數十條以上襄勤嘆服輯三載未成而襄勤卒事中輟矣其後河督張公副河督潘公至仍延士錫纂脩而卒成之士錫自中歲左肘患瘤治罔效其後瘤敗而卒好治陰陽五行家言殫心者數十載發揮古義錯縱變化歸於自然實絕學也嘗曰世之言奇門六壬相墓者皆各自爲學吾獨求其源於易以貫之然求之愈深聞者且駭恐世之卒莫予知也

朱昂之弟 淵

昂之字青立一字青上號津里武進人文嶸子畫承家學善山水下筆遒勁出入宋元酷近大癡而於思翁堂奧尤深造有得兩目上視蓋觀摩古畫久

而習成也書亦似董嘗一遊京師與姚元之相友善昂之生於申姚亦生於申長姚十二歲又所生月日時皆同又名若字又與姚參差同其半而又獨重姚之爲人然每過姚但飲茶耳若飢則出袖中巾取數錢令僕人購餅以食姚欲備則去一日別姚姚曰祖道古人不廢余尙可食客乎迺約日製春菘一器煮肉二斤飽食之乃出關至錦縣應其姊壻之招以官署不勝聒聒遂亡去其戚蹤跡得之已逃禪矣拘之回送歸僑居吳下挈妻子賃居城西委巷殘帖廢畫叢積几榻生平無他嗜飲食夢寐俱在烟雲墨海中聞有秘蹟不憚數十里借觀探索必得而後已故其伸紙發墨克萃衆長發妍韻於筆外然虛懷自抑恆言吾畫每一運腕輒被三王吳惲所縛不能脫其範圍一藝之成固非易事也山水外間作花卉梅竹蘭石清逸超縱趙學轍太守與之交深敬服之呼爲諍友學轍亦工董書者其工力從可想見矣弟淵字起真工花鳥師南田後棄去專作山水以兄爲法亦有時名

孟覲乙

覲乙字麗堂號雲溪生武進人善花卉得惲家三昧少與朱青立同窗且相

善也善啖無室家兒女一身子然居京師十餘年不與人結納目短視作畫時以筆醮色每誤醮水則以水塗之及紙乾但存魂而已與其人善則必精心於高古一派以其人俗則作俗畫與之然其所謂俗者每得佳畫所謂高古者半水半墨若在烟雲縹緲間矣若不喜其人則以紙作畫而他贈焉其幽僻如此亦工山水能詩。

劉逢祿 子承寵

逢祿字申受武進人綸孫嘉慶十九年進士改庶吉士散館授禮部主事在官十二年不遷簿書期會敦肅恪共如一日於學務深造自得精公羊探源董生發揮何氏成釋例三十篇以微言大義刺譏褒諱挹損之文辭洞然推極屬辭比事之道又成箋說答難決獄等凡十一書自漢以來未嘗有也中交張惠言共通虞氏易爲六爻發揮旁通表虞氏變動表卦象陰陽大義易言補易象賦卦氣頌凡五卷又旁求之於書掇拾殘缺兼蒐衆說爲古今文尙書集解三十卷又旁求之於詩病古韻未有專書近人推演遞密而收字不全入聲分配無準爲詩聲演二十七卷皆創通奧域遂於大道勾萌新意

曾達柯幹者也又以餘力及九章小學成書數卷取史記天官書及甘石星經爲之疏證成書數卷又欲仿經典釋文之例爲五經考異已就兩經而未成其在官凡同列有疑不能決者爲引經義別白之而公卿亦多就問所疑無不據經決事有董相風在官有庚辰大禮記注長編十二卷春闈雜錄一卷東陵勘地圖說一卷石渠禮論一卷悉事言翔實疏證確審大抵逢祿著書不泥守章句不分別門戶宏而通密而不縟其大宗也統所輯及手著之書計二百十餘卷精力可謂過人矣子承寵嘉慶二十四年舉人才藻絕俗力學嗜古甫壯遽卒士論惜之

管學洛

學洛字道明號午思武進人世銘子敏而好學有幹局能爲人任事有鋒穎人恆忌之爲詩多寄託得主文譎諫之意尤工於詞而於科名仕宦未得一當往往憔悴自傷年甫四十鬚髮盡白同人以學洛久不第皆飲之俾入貲爲知州嘉慶十四年聞選期近遂做裝北行行六日驟以嘔吐卒於清江舟次年四十九

黃乙生

乙生字小仲武進人景仁子年十三而孤賴父故人周卹成立二十游廣東廣東風氣淫靡游客無不挾妓窮飲博日夜號嗽而不屑事事乙生孤介絕俗人以爲怪物大興朱文正公巡撫廣東惡其習言於衆曰數千里大小郡數十幕中竟無一人自愛者或以乙生聞乃大喜以此知名久之歸刻苦於學治鄭氏禮節目無所不詳奧窔無所不闢講說一篇貫穿諸經如壑趨海又好楊曾之書凡度詞隱語彼術中所謂祕而不洩者皆發其蒙嘗以語世之號爲知地理者不能解也唯董士錫善之工書入能品道光元年舉孝廉方正將應召用乃竟不遂年五十三卒有一子目重瞳子聰穎特異將冠而夭遂無子

莊綬甲

綬甲字卿珊武進人存與孫附監生承其家學能盡通之斐然有著述之志以奔走衣食日月耗於道途以卒年五十五每論當世積學之士述造所得其致功之門徑詣力之淺深銖分而寸計之莫不洞其得失纏纏有條理尤

爲從父述祖所愛重凡所著述常與上下其議論而資其攸焉

湯貽汾

貽汾字雨生一字若儀號粥翁武進人以難蔭累官至浙江樂清協副將咸豐三年洪秀全陷江寧殉難朝廷聞之賜諡貞愍蓋有大奎至貽汾三世殉節矣貽汾於文學尤足以名家自唐宋以來以詩書畫三絕名世者代不數人有清一代毗陵人以詩書畫號大家著天下者得二人焉一惲壽平一貽汾也二人者於畫爲尤著二家之子姓承先人之學遂成風尙壽平之後有珣源濬源景宅仁與三標秉怡女士冰懷娥懷英珠貽汾之後有綬名懋名祿名世樹妻董琬貞女嘉名子婦金佩芬皆卓卓於世者祖大奎令鳳山殉林爽文之難父荀業同殉奉旨給雲騎尉世職故貽汾就武職自樂清協副將告歸僑居金陵築琴隱園於雞籠山下以逼仄復於城北築別墅名獅子窟有泉石卉木之勝藥欄花隴曲折翳插架數萬卷州居部別丹黃爛然嘯咏其間邈焉若與世絕焚香鼓琴脩然出塵海內名宿多與之游江山水物之盛爲今古罕有稟質穎異凡天文地輿百家之學咸能深造書畫詩文

至臻絕品嗜飲酒工彈琴下至圍棋雙陸擊劍吹簫靡不好亦靡不精也

趙申嘉

申嘉字芸酉陽湖人嘉慶二十一年舉人翼孫才氣橫絕知名最早而迄無所遇出語迴軼時輩性豪放不屑屑於繩墨間暇輒披吟夜分不輟故所詣獨至中年家漸落遂客遊粵楚燕豫間一時名公鉅卿虛席以待無不相得益歡相與評量古今感歎時事往往發之於詩文脫稿卽隨手散佚不自矜惜故所傳詩餘一卷外不多觀

董基誠

基誠字子誦一字籽莘號玉椒小字振陽湖人嘉慶二十二年進士授戶部主事因假照案革職援例開復改刑部洊升郎中治獄詳覈京察未列優等復援例以知府分發河南署懷慶調南陽補開封聽斷明決數月釐積案數十百起終以勞瘁卒於官工駢體文

董裕誠

裕誠初名曾臣字方立一字蘭石陽湖人基誠弟嘉慶二十二年舉人幼穎

異未弱冠已與兄騰踔士林進止凝然不強笑語頗狷急而訥於言辭負經世才衣食奔走足跡半天下凡山川形勢政治利弊采覽所及歷歷識之不忘少喜爲沈博絕麗之文稍長更肆力於律曆數理輿地名物之學平居於世俗事絕無所嗜特善深沉之思書之號鉤棘難讀者一覽無不通曉復爲出新意闡隱曲補罅漏專門名家殫數十年之力而探索之者祐誠晨夕之間已突過之然其志意欲有施於世特以偏曲一節亦儒者所不遺隨所見而了之未嘗以自矜也

方履錢

履錢字彥聞一字朮民陽湖人聯聚子嘉慶二十三年舉人大挑一等分發福建以知縣用幼穎異七歲讀書百行一二過輒成誦道光八年赴閩時議修通志大府命擬章程善之頒郡縣以爲法署永定縣知縣永定志久失脩乃延邑人商榷而手自屬稿志成人服其精覈調署閩縣閩俗犷悍小有睚眦持械互鬪乃集鄉老族正戒諭之剖析利害甚至鄉民頰首敬聽有泣者閩俗婦欲殉夫者戚黨率糾錢爲臺於四達之衢婦盛服祭夫辭別其尊嫜

乃登臺自縊戚黨持香送之觀者如堵時南臺有某氏婦將築臺縊履錢知之召其舅姑父兄來諭之曰烈婦殉夫至情至性不容自遏聖人猶以爲過中今築臺而要之是驅之死也不悛者坐以法婦感泣再拜去越日人不備縊於房論者謂此婦均死然死得其正非履錢克敦風教不及此自後亦無敢築臺觀縊者十一年年四十二卒於官於學無所不究經史有異同者必集諸書反覆互證求是乃已工駢體文詩古體宗六朝近體出入於大曆十子尤喜爲長短句善隸書嗜金石文字所得多金石萃編寰宇訪碑錄所未載者其學出自兩漢非尋常經生家言凡天文地理氏族源流六書九章之法耆闡梵莢之書皆旁通博涉無所不窺也

楊士昕

士昕字邵起武進人嘉慶二十四年舉人直隸寧津縣知縣與董基誠祐誠稱三才長於醫免官後居保定以醫自給清貧如儒素工詩文善畫瓜果隨意揮灑頗有韻致

楊時泰

時泰榜名鴻乙字穆如武進人嘉慶二十四年舉人工醫學自明以來江南言醫者類宗周慎齋慎齋善以五行制化陰陽升降推人臟氣而爲劑最準雍正以後變而宗張路玉則主於隨病立方遇病輒試以方迨試徧則束手時泰於醫深得慎齋閩奧尤善以脈之並見變見揣測臟腑寒熱虛實其用藥一準劉若金備得金元四家開合精理凡值錯雜難明病每每斂數味成一方若抉而去者人咸推服焉以道光丙戌大挑一等署山東莘縣知縣卒於任所著本草述鉤元卽約劉若金書而薙其繁蕪者也

李述來

述來字紹紆武進人諸生工書及畫梅詩清雅以五言爲尤勝學右丞左司而時出新意非專以摹擬爲工者卒年九十一

楊新甲

新甲字振華號西園陽湖人諸生世居孟墅里世耕讀六歲能詩比長益篤於學事親婉愉養志治經史所得益邃密以文行重於鄉其治易原本程朱而於漢儒消息納甲之說則深取之以爲坤之東南得朋西北喪朋非此則

取象皆假借其不膠守類如此

丁嘉植

嘉植字琴涵武進人工山水學婁東諸王而稍變其意

莊存

存字義門武進人花鳥似馬元馭又擅大松墨梅

楊近思

近思字思餘武進人書畫俱學南田尤工寫梅

陳峻

峻字石厂武進人工寫真兼善山水人物花鳥寓吳門道院長齋供佛垂三十年以畫自給性和易人皆樂與之交其畫不專一家簡老似陳白陽秀逸又如忘菴老人年七十餘沒於吳門

孟耀庭

耀庭字心閒陽湖人諸生工大小篆及行楷書寓吳中最久著閒居散筆論書與畫洞中肯綮喜寫蘭自題小詩亦極有風致

楊振

振初名振甲字蕉隱陽湖人諸生工詩古文與屠倬齊彥槐友善畫工小品水竹空濛氣韻彌遠有似能不能之妙書法勁秀在褚歐間嘗作後書譜序補孫過庭論所未及其言深得書家秘要詩宗唐人尤工近體

韓桂

桂字古香武進人少攻舉子業不得志棄去從錢塘李玉峰學琴同邑畢焦麓學畫不數年並得其秘嘗謂作畫必先通書法四體並工然後有古趣今人不解學書徒事臨摹舊本嘖嘖自賞焉得勝人又謂昔人用筆之妙長而曲斷而連此尤深得畫中三昧短視不能作大幅然尺素之中氣勢充足不爲紙限弄筆偶倦時鼓一曲泠泠然有乘風之想回視筆墨中如有靈氣往來也其生平所寶宋琴歿後歸湯貞愍古琴之列矣

湯洽名

洽名字誼卿別號春帆武進人嘉慶時爲州同知學於張惠言以能文名通古學兼明天官曆數風角星算六日七分專精深入以算學考取天文生

費開綬

開綬字佩青號鶴江武進人嘉慶二十五年進士選庶吉士授編脩官至江西巡撫其任陝西潼商道時黃河漲成民多墮溺輒下令拯活之獲尸者給錢掩埋有差及調任胡南衡永郴桂道所屬州縣有水患親至其地給振水亦疏濬得平歷雲南按察使江西布政司擢江西巡撫官江西凡六年六年之中疊有水患安輯拊循具有條法施振不費官帑不假民力令在官者各輸俸銀養廉銀而已爲之倡更使紳戶富戶各輸銀錢凡獲銀三十餘萬兩民以全活

蔣彤

彤字丹稜陽湖人諸生居東堰從李兆洛游淹雅宏通篤家法精於考禮而文章亦極研鍊養一子述養一先生年譜暨陽問答均彤手編

李嶽生

嶽生字子喬武進人諸生結髮卽能詩及冠已哀然成集言詩自漢魏以至清人其源流正變了然於胸其詩自恨情深雖言多綺麗而楚騷遺意婉曲

絃外咸豐庚申髮匪竄常州嶽生率兵禦之於鄭陸橋兵敗反鬪瞋目叱之
遂遇害

高昕炤

昕炤字小山武進人書法懷素詩學皮陸困於小試潦倒以終

△屠 珂

珂字韞齋武進人弱冠入庠從舅氏管松崖先生讀中式甲午順天舉人乙
未進士補授山西五臺縣知縣在職六年革蠹胥除苛政勸農桑興教化獄
求得情案無留牘旋以勞績升福建延平府上洋通判潔已愛民調署馬家
港撫民通判以直忤上官罷歸在里中尊聞書院授徒爲業卒於嘉慶十三
年七月享壽六十三自訂文一百二十篇付梓世稱韞齋文集

上海图书馆藏书



A541 212 0214 9312B

